

東
華
續
錄

東華續錄

咸豐四十五

臣王先謙敬編

臣陶澐宣恭校

二月甲午朔諭軍機大臣等王懿德等奏夷商販茶請准租屋居住一摺福建省因茶販不通暫開海禁各國夷商多來貿販該督撫爲廣收茶稅俯順輿情起見准該夷領事承租南臺天安寺雙江臺後空曠地基並准夷商等承租大橋以南觀音井下衙等處屋地六所爲儲貨棲身之地均係民夷兩願並立租約蓋用印信係照從前和約辦理該夷等向化遠來自應處以館舍用示懷柔惟民夷雜居必須嚴加約束且南臺一帶逼近省垣旣已租與屋地著該督撫諭令該夷領事官金執爾等稽查彈壓務令與本地居人相安無事免生嫌隙方爲妥善其續到夷商需租房屋並著

飭令該地方一律辦理將此諭令知之○荊州將軍官文等奏遵
調滿營精兵仍由貴陞統帶迅赴下游會剿得旨汝未便遠離荆
州自屬實情惟貴陞能否得力殊深繫念川陝軍餉已有寄諭令
伊等催解矣○湖北巡撫陶恩培奏逆賊分踞漢口漢陽水師獲
勝臬司帶兵回省見籌以戰爲守之策請迅撥餉銀以濟急需得
旨各處餉銀已有旨令楊霈官文等迅速分解汝旣知以戰爲守
豈能聚集多兵株守武昌況逆匪見已分股上竄更應追剿○乙
未諭內閣吳振械蔣霽遠奏興義首要匪徒殲除淨盡地方肅清
剿辦尙屬迅速所有雲南會剿官兵著吳振械等酌量裁撤歸伍
至遵義府屬匪徒竄往黔西前經官兵疊獲勝仗諒不難剋日蕪
事惟首逆楊淵等尙未就獲著蔣霽遠嚴飭文武各員迅速緝拏
務獲毋任漏網稽誅○諭軍機大臣等御史伍輔祥奏黔匪漸就

肅清請飭劃清黔蜀疆界駐紮武弁以資彈壓一摺據稱四川之
綦江貴州之桐梓仁懷該三縣疆界錯雜最易藏奸應將各處所
插之地分別歸併無許犬牙相錯各於交界要隘酌駐武弁其黔
蜀本省有似此夾雜者亦請一律劃清等語各省交界處所遇有
盜賊地方官互相推諉原係向來惡習該御史請明定黔蜀疆界
互相歸併自爲巡緝奸宄使盜賊無可隱匿著該督撫會同體察
情形如無流弊卽行酌量歸併儻有窒礙難行之處止可仍照舊
章責成該地方文武不分畛域認真緝捕儻有藉詞推諉捕務廢
弛者卽著嚴參懲辦原摺鈔給閱看將此各諭令知之○諭和春
福濟奏遵查甯國等屬捐輸防堵各案未經請獎原委一摺所奏
自係實情各屬勸諭捐輸辦理防堵如果實能出費出力著有成
效原應亟予請敘以獎其勞茲閱另單開列各案藩司展轉駁詰

均出有因若以款目混淆之捐項小有斬獲之微勞率行臚列多人紛紛給獎誠不足以重餉項而服人心著和春等卽責成該藩司道府迅速查明務使捐餉不至虛糜而獎勵亦無冒濫再行奏請恩施儻所屬府縣有浮銷捐項含混詳報以致展轉飭查遲延請獎者卽著據實參辦庶足以鼓舞人心俾捐生不至藉口另片奏捐輸方費及軍餉各項請分別給獎等語著照所請所有捐輸防費之員卽照常例給予封典職銜其偏近賊氛捐貲堵剿著有成效者仍照舊餉事例給予職官選補以示區別將此由五百里諭令知之○諭吉爾杭阿奏酌擬獎賞等語佛蘭西提督喇呢噶於官軍攻剿上海逆匪情殷助順吉爾杭阿請賞給紬四卷銀一萬兩以示懷柔尙爲妥協著卽照所擬辦理將此諭令知之○諭各省辦理捐輸原以接濟兵餉若任令不肖州縣恣意侵吞藉端

需索徒飽官吏之橐無補餉項之實誤國病民深堪痛恨前據河南學政張之萬奏參知縣汪曜奎侵吞捐輸業經革職拏問恐他省似此者亦復不少前次載齡奏道經山陝訪聞州縣多有吞捐冒銷等弊是該署撫未到任時早有見聞必應嚴杜弊端以歸覈實著載齡嚴密訪查如有侵漁情弊卽行據實嚴參從重懲辦將此諭令知之○和春等奏官軍晝夜環攻廬舒巢等縣賊匪屢有斬擒得旨覽奏不過小有斬獲實難指日克復汝等屢次奏摺率云斃賊數百或不計其數若果盡屬從實何以愈殺愈眾每至攻城必爲所覺傷亡想亦不少雖逆燄鴟張何官兵無能至此瑣瑣贅言全屬搪塞和春福濟督師皖境一載有餘遲延委靡之罪百喙難辭朕尙不處治汝等原望奮勉圖功以贖前愆朕猶不惜諄諄手諭若仍恃奏章爲敷衍則罪由自取朕惟知以軍法從事勿

謂言之不先也懷之特諭○以克復含山縣城賞翰林院編修李鴻章知府銜花翎佐領輯順多隆武常壽參將扎隆武守備俞應彪等花翎餘升擢有差○丙申駱秉章奏自田家鎮半壁山水陸大勝後九江府城原可乘機克復因北岸廣濟黃梅賊勢尙熾塔齊布羅澤南率諸軍盡銳攻勦始克兩城賊以其暇得嚴密布置比塔齊布等回軍渡江則九江已屹然堅城難以遽下矣曾國藩偵湖口以內賊船甚多慮其出江爲害卽分軍勦之是時黃梅復陷九江對岸小池口一帶復有賊蹤曾國藩水師無陸軍夾護而三板戰船又已盡入湖口冬令水枯急切不復得出以致有十二月二十五日劫營之挫督臣楊需駐軍廣濟賊至卽潰正月初三日退至黃州初五日退至漢口其出也盡率兵勇萬餘以行武昌省會重地僅畱逃潰疲弱之兵數百飭藩司夏廷樾等居守撫臣

陶恩培到任甫數月一切未及布置當督

臣

退至漢口時賊匪於

初七日尾追而至民人扶老挈幼號泣奔走情形極爲慘痛而督

臣

又不知退駐何處矣頃據平江縣稟稱賊匪大股均聚興國州

其爲犯鄂無疑鄂城餉竭兵單勢甚危急督

臣

所帶兵勇多已潰

散曾國藩塔齊布糧臺坐船多被燒毀軍實蕩然勢難驟振

臣

維

湖北湖南唇齒相依自去秋以來本省南路防剿兩粵之賊無日

不事戒嚴投除腹地之匪一時尙未就緒茲復值北路警報沓至

時勢更非上年可比見在一面抽調南路兵勇赴省並飭局趕造

船礮一面飭北界各府縣督飭鄉團添募壯勇爲援剿之計一俟

諸務稍集卽當相機辦理奏入得旨所造礮船仍應接濟曾國藩

是爲至要○戊戌祭

大社

大稷○

諭內閣德勒克多爾濟奏

喀爾喀土謝圖汗車臣汗兩處汗王貝勒貝子公扎薩克等呈稱

因賊匪尙未蕩平情願捐助馬匹以備軍需求爲轉奏等語喀爾喀兩處汗王貝勒貝子公扎薩克等因賊匪尙未蕩平屢請捐助銀兩馬匹實爲出於至誠朕甚嘉悅若再捐助馬匹朕心實爲不忍見在直省賊匪已經殲除河北賊匪亦就肅清著德勒克多爾濟傳諭土謝圖汗車臣汗兩處汗王貝勒貝子公扎薩克等伊等所捐馬匹著勿庸賞收以示朕嘉尙體恤蒙古世僕之至意○諭軍機大臣等英桂奏密縣土匪戕弁焚署並竄擾鄭州一摺該州縣密邇省城突有土匪竊發何至如此猖獗據該府縣所稟又無起釁根由顯係地方官辦理不善意存諱飾見在河南東南兩面逼近皖楚賊氛甚關緊要而河北各屬聚眾抗漕之處尙復不少若不速將此股撲滅設有蔓延勾結全省將不可問余炳燾出省勦辦所帶兵勇僅止數百名是否足資勦捕著英桂體察該省邊

境情形儻安徽邊界防務稍鬆卽添撥官兵星速馳往如牛鑑張維翰等無論何人皆可酌量派往崇安於輝縣之案如已辦結亦可帶兵會剿總以迅速殄除毋致釀成巨患爲要仍著英桂查明此股土匪究由何處竊發因何起釁並余炳燾出省後如何剿辦情形迅速詳細具奏至楚省軍情據該撫奏報與楊需所奏大致尙同惟塔齊布已到漢鎮之語未爲確實竄擾仙桃鎮之賊是否已被荊州兵勇擊退亦未據楚省奏報著英桂一面嚴防信陽等處一面確切探明隨時具奏將此由六百里加緊諭令知之○向榮奏疊次攻剿鎮江賊匪並籌調兵勇布置上下游要隘得旨吉爾杭阿已有旨幫辦軍務自可督師迅克鎮江汝仍在金陵扼賊防竄爲要一面嚴飭吳全美等速行斬鍊上駛以期水陸合擊上游師船已回武昌俟回竄楚北之賊剿滅淨盡方能再下九江潯

郡安慶克復方能直搗金陵見在事機不順一至於此惟冀汝等協力和衷無論江鎮兩城先克一處庶幾漸有握勝之機也○命魁聯爲候補按察使仍留湖南辦理防勦事宜調文格爲湖南按察使以張敬修爲廣西按察使

由右江道遷

○己亥 上御經筵○僧

格林沁等奏伏思高唐逆匪爲數無多踞守十月之久堅匿不出自臣移營以來該逆逐夜出巢探路冀圖逃竄正月二十九夜閒

密令南面站牆官兵分開隊伍停止更轄故作疏防之勢設該逆潰出俟其離濠漸遠再行截擊子刻該逆果然撲出見此段毫無官兵全股直往南竄臣等督帶馬隊五百餘名銜尾緊追該逆拚死狂奔至距高唐五十餘里之荏平縣屬馮官屯入村踞守該處三村相連周圍挑有深濠當卽催調後隊馬步官兵義勇於初一日辰刻趕到由西面撲入村中一面救護該村男婦一面用火焚

攻痛加殲勦立將西面二村奪回斃匪二百餘名生擒十餘名據供逆眾八百餘名欲向濟甯奔竄官兵擊殺甚多僅贖五百餘名等語見已將大礮運到向內轟擊以期殄滅無遺頭等侍衛達崇阿吉林協領委營總豐山委參領豐玉同時陣亡均請照例賜卹以慰忠魂 上諭內閣僧格林沁等設法誘賊出巢收復高唐州城逆匪南竄見被痛勦僅餘五百餘名蟻聚馮官屯村莊東南一隅抵死抗拒該大臣等務當激勵兵勇晝夜環攻立將醜類盡殲及早肅事以慰朕望其陣亡之頭等侍衛達崇阿吉林協領委營總豐山委參領豐玉均著交部照例議卹○諭軍機大臣等僧格林沁等奏收復高唐賊竄馮官屯一摺該逆窮蹙餘生困守一隅大兵四面合圍諒不至再有竄逸見在大礮已經運到卽應盡力轟擊村莊設備雖爲嚴密究不能如城池之堅固在城則利其竄

出以便跟追在村則必須兜圍以防奔突計自初二日進仗後又已數日當必更形得手務宜於奮勇之中加以慎重儻任其旁竄他處或困守村莊則又蹈從前故轍諒該大臣等必已早有成算不令釜魚檻獸日久稽誅也崇恩奏資遣裁撤練勇等語著卽照所擬妥爲籌辦刑部主事楊熙本由四川帶勇前來見在裁撤川勇需人彈壓著崇恩詳加察看如該員尙能約束卽飭令管帶回籍毋令沿途滋事儻此外尙有帶勇之員無須該員管帶卽飭令回京當差將此由六百里加緊諭知僧格林沁並傳諭德勒克色楞西凌阿崇恩知之○先是葉爾羌參贊大臣常清奏籌畫新疆南路八城全局酌裁防兵以減經費並折徵加鑄以濟兵餉命軍機大臣會同戶部兵部議至是會奏葉爾羌滿洲換防官兵二百五十五員名既議全行裁撤應令烏魯木齊都統於綠營兵內照

數添派赴葉爾羌等城換防抵減內地調派以節糜費喀什噶爾滿洲換防官兵出隊得力綠營換防官兵分守各城要隘均無庸議裁以重邊防其折徵倉糧一節既因各城倉糧儲積愈多出糶不易應自咸豐五年起將正科糧石徵收本色一半折價一半所收折價由該大臣酌中定價以示均平至加鑄原以裕餉葉爾羌所屬及烏什喀什噶爾兩城既經採有銅苗可資鼓鑄應令該大臣商同各城大臣廣行開採加鑄鼓鑄各項大錢分成搭放兵餉以濟銀兩之不足從之○庚子諭內閣王懿德等奏仙遊軍務完竣地方肅清一摺福建仙遊縣匪徒滋事經該督派撥兵勇進剿攻破賊巢擒獲首要各犯分別正法惟逆首林俊尙未拏獲據獲犯供稱業已被火焚斃是否屬實仍著該督等確切查究嚴飭搜捕毋令漏網見在該處匪黨盡殲地方安靜官兵悉數凱撤所有

在事文武員弁著該督等擇其尤爲出力者酌保數員候朕施恩
○諭軍機大臣等文煜奏逆匪竄撲沙頭等處擊退竄回仍嚴密
防堵一摺瓜州逆匪屢次攻撲沙頭營盤雖經兵勇擊退而該處
爲裏下河最要門戶文煜所帶之勇爲數無多設該逆乘虛竄擾
裏下河一帶在在堪虞托明阿統領全軍蔽爾瓜州日久未能克
復若再令該逆紛紛旁竄致完善之地復遭蹂躪辦更形棘手
所有沙頭等處各路要隘著該大臣等嚴密布置如有東竄匪黨
卽水陸夾擊以杜紛擾薩炳阿見帶兵二千名馳赴瓜州軍營托
明阿等得此精兵援應更足以資分撥仍一面迅圖克復瓜州毋
再遷延貽患所有此次堵剿出力員弁准其酌量保奏將此由五
百里諭知托明阿陳金綬雷以誠並傳諭文煜知之○改撥山東
解部銀二萬兩山西解部銀五萬兩解往高唐軍營備軍需○癸

卯諭內閣樂斌奏匪徒聚眾戕官攻城見已殲擒殆盡地方一律肅清此股匪徒因搶劫起釁膽敢戕官攻城肆行焚掠實屬罪大惡極除張老八等業經正法外所有見獲匪黨著樂斌督飭委員嚴行審訊從重按律定擬仍嚴飭各該地方官搜捕餘匪務期淨絕根株毋任漏網○甲辰諭軍機大臣等本日據軍機大臣會同戶部詳議鈔法章程一摺民間完納錢糧自咸豐六年上忙起凡應搭官票改換寶鈔議令直隸山東河南三省先行遵辦內如部頒寶鈔令各省藩司編立號簿蓋用印信再行解部所用騎縫印信篆文大略相同恐小民難於辨認應否添設簡明標識之處著各該督撫斟酌奏辦其各省收到寶鈔並准由各官銀錢號兌賣事屬官民交涉防範稍有未周易啟勒捐把持之弊至酌給羨餘一層應由該督撫體察所屬情形通盤覈計酌立定額固未可過

於苛刻亦豈容稍涉冒濫立法之始不厭周詳著桂良崇恩英桂各就該地方情形悉心斟酌妥擬詳細章程迅速具奏總期實鈔得以流通而兵民亦藉紓困累原摺著鈔給閱看將此各諭令知之○諭僧格林沁等奏連日勦賊情形一摺據稱賊匪見踞馮官屯沿牆掘地犬伏以避槍礮一時攻勦尚未得手該逆竄出之後屢被大兵痛勦所賸狡悍之賊諒已無多仍當激勵兵勇設法速攻以期及早蒞事尤須加意慎重勿致窮兇乘間竄突復擾他處劉自明係由連鎖搜獲之犯其所獻地攻之法未免曠日持久且該犯曾爲賊僞將軍是否可恃並著該大臣確加體察勿墮奸計總之馮官屯旣不若高唐之有城垣可守又不若連鎖地勢之寬廣該大臣旣能勦除連鎖大股悍匪豈有區區殘寇不能悉數殲擒猶待遷延時日耶所需軍餉已於直隸山西等省飭撥務當迅

速奏功以慰朕望將此由六百里加緊諭知僧格林沁並諭德勒克色楞西凌阿崇恩知之○袁甲三奏前請以郭世亨開缺畱於永宿蒙亳一帶並以王啟秀接署宿州知州奉旨著再與和春福濟等妥商此案臣因綏靖地方需員甚急是以一面具奏一面鈔稟知會福濟等嗣據覆函深以爲然並稱先得我心實深感激等語此次接奉硃批復恭錄行知並加函商旋准和春福濟函覆極稱臣因公起見整頓地方之苦衷知府陸希湜不能久出在外必須添派幹員惟聖意既不肯更易熟手不若將見隨臣營之知府張家駒駐紮潁亳如臣別有所見卽請單銜具奏等語是和春等於臣前奏仍未稍有異議且陸希湜本任所屬太和阜陽霍邱潁上均逼近楚豫界連六安正陽處處均須防禦誠如福濟等所云勢難久出在外至張家駒委駐潁亳原可期其得力惟臣營

委員本少若張家駒再駐該處則臣營遇有緊要事件實在無可差遣此次和春等所見既與臣並無不合其擬改委張家駒之處係於臣營乏員差委情形尚未深知可否再懇天恩准將升用知府見署宿州知州郭世亨開缺以知府補用畱於蒙亳宿永一帶勦辦賊匪並准以王啟秀接署宿州知州以資臂助上諭袁甲三奏通籌皖省軍務請分撥北路勁兵數萬先復廬州一摺該省見在軍情自以急籌攻克廬城爲要見當連鎮蕩平北路勁兵原可酌量抽撥但廬州郡城自前年失守後已越年餘和春福濟所統官兵數逾巨萬豈不能四面環攻迅圖克復必待北路分兵且連鎖官兵本無數萬之數除撥赴揚州外隨往高唐一帶者不過數千即使撥往安徽尙不能如和春等見帶官兵之多安得有如袁甲三所請之數耶和春等前此奏報進仗情形摺內朕已嚴

切批示該提督等惟當就見有兵力迅速籌攻不准再事耽延以
尙待添兵爲藉口袁甲三旣駐臨淮皖省東北兩路有可進取之
機亦宜隨時籌勦不得徒以籌畫剖析之詞空言入奏也至郭世
亨王啟秀二員前據袁甲三奏請將該員等分別開缺調署朕所
以批令與和春福濟妥商者原以調署牧令必須與督撫會銜並
非不准袁甲三與聞舉劾乃閱另摺覆奏止稱往返函商仍未聯
銜具奏且援引前事曉曉置辯尤失敷陳之體袁甲三著傳旨申
飭仍著福濟會同和春袁甲三詳細酌度如郭世亨於潁毫地方
辦理實在得力卽將該員奏補實缺知府亦無不可其宿州知州
應否卽以王啟秀接署之處亦著一併會奏另片奏請將失察私
鑄槍礮販買私硝處分分別變通等語其如何稽察如何拏禁總
在地方官實力辦理如果於此等私鑄私販匪徒拏獲較多不但

寬其處分並可酌量請獎若先將處分寬免是豫開一寬縱之條
於緝捕轉無實際著和春福濟袁甲三嚴飭地方文武員弁認真
緝拏總以杜絕奸萌爲要無庸另立章程將此由六百里各諭令
知之○乙巳諭內閣陶恩培奏請飭催道員赴任等語湖北荆宜
施道雷維翰例限久逾延不到任著該部迅速飭催赴任並查明
該員因何遲延逾限之處先行照例議處湖北督糧道金安清前
經黃宗漢委令赴上海防剿見在該縣業已克復並著飭催迅速
赴任此外部選及揀發該省各員著一併飭催並查明逾限人員
據實參奏其湖北按察使文俊著迅赴新任無庸來京請訓○諭
軍機大臣等楊需奏克復漢川斬水進攻漢口並截剿上竄賊匪
一摺又據陶恩培奏逆賊句結興國州通山縣土匪肆擾省垣喫
緊並請飭曾國藩塔齊布回軍江漢各摺片詳覽楊需所奏見在

劉富成等兵勇已至禁店進逼漢陽與胡林翼等水陸夾擊漢川
既經克復上竄岳口之賊與漢口之賊隔絕不通見派兵勇分路
進攻惟該督駐紮德安原爲防賊北竄而陶恩培奏稱逆賊勾結
興國等處土匪大肆殺掠省垣愈形喫緊該督與省城聲息隔絕
此時總當迅速克復漢陽漢口爲保守武昌之計該督萬勿株守
德安藉詞延誤況該督由北路節節攻進距漢鎮僅二百餘里能
否分兵兼顧武昌較之曾國藩等折回援應尤爲便捷見在武昌
兵力單弱督隊打仗僅胡林翼常恩二員設該省稍有疏虞貽誤
之罪楊需豈能諉卸耶曾國藩等前因戰船損壞全數開赴上游
修理又因陸軍銳氣尙盛仍欲鼓行東下直擄金陵原以逆匪上
竄牽掣我師若展轉回顧不但前功可惜且恐兵勇之氣不能復
振是以諭令該侍郎等攻克九江卽合軍東下惟見在賊踞漢口

漢陽武昌情形關係緊要設有疏失該逆勢踞上游我兵仍係腹背受敵應如何設法協濟武昌而於攻剿九江大局仍無妨礙著會國藩等體察見在情形或該侍郎帶兵自行前往仍畱塔齊布會同江西兵勇攻剿九江務當統籌全局斟酌辦理楊需會國藩接奉此旨卽將如何籌辦情形迅速具奏以慰廑念陶恩培仍當督飭胡林翼等以勦爲防固守省垣以待援兵之至所需軍餉已飭鄰省撥解矣該撫片奏省城見任候補各員聞警逃匿等語實出情理之外著卽查明參辦金安清等已有旨飭催矣將此由六百里加緊各諭令知之○丙午諭軍機大臣等英桂奏遵旨布置楚豫邊防並密縣鄭州等處剿匪情形一摺又片奏請飭調北路凱撤官兵更換豫省兵勇等語河南省外禦鄰氛內捕土匪防剿兼施所有防堵正陽六安兩處及南陽新野唐縣信陽關各要隘

在在需兵河北各屬匪蹤亦未淨絕該撫欲請調連鎮得勝之兵
二三千名赴皖以便豫省防皖各兵遣回更換一俟高唐竄匪殲
除卽行酌調赴皖俾豫省防兵得以撤回供本省之用此時豫省
勇多兵少該撫惟當仍飭牛鑑等實力扼守並飭張維翰等將近
皖餘捻輝縣逃逆趕緊搜捕鄭密禹州各境內藏匿匪徒亦應跟
蹤追剿盡絕根株內患旣清便可專防邊隘協濟楚皖昨據楊儒
奏克復漢川蘄水劉富成之兵已至蔡店進逼漢陽又據陶恩培
奏逆賊勾結興國通山土匪大肆殺掠武昌頗屬喫重襄河亦有
匪蹤見雖南陽一帶未聞警報防範仍須嚴密光商一路該撫已
派成景帶兵駐紮邱聯恩移紮信陽藉以控制南陽該撫見在陳
州居中調度務須隨時偵探何路喫緊卽往何路策應毋稍遲延
署密縣知縣胡燕清前已降旨革職著毋庸議並責令隨同剿捕

不准稍畱餘孽將此由五百里諭令知之○托明阿等奏焦山水師進剿連毀北岸賊隄屢有斬獲得旨水師雖有斬獲亦屬小勝仍應趕緊督催勿任疲玩○丁未諭軍機大臣等官文等奏仙桃鎮擊賊獲勝岳家口追賊失利一摺詳覽所奏賊蹤距荆郡不過百餘里之遙該處官兵旣須分布設防又須沿河下擊實有無可抽撥之勢楊需安坐德安所帶兵勇至一萬七千餘名之多於襄河之賊則稱爲意圖牽掣於漢鎮之賊則稱爲勢難久踞且應赴上游應剿漢口尙在游移未定究竟一月以來所辦何事該督摺內已有賊至岳口之語則該逆之窺伺荆襄已無疑義猶以收復漢川斬水謂爲賊匪聲勢隔絕抑何憤憤至此貴陞此次失利誠不免孟浪失機何以與賊接仗之時僅有荊州官兵而該督所派之李錦鑾葛以敦蔣立松等並未見隨同接應是該督直置荆襄

門戶於不顧而終日籌畫不出楊店蔡店數十里之間殊爲可恨
見在荊州緊急載增旣已出城郡城重地亦不可無人鎮守官文
所稱親督進剿之處務須斟酌盡善不可輕爲嘗試楊需前派各
兵著卽飛催前進並於進攻漢陽兵勇內酌量改撥折赴上游以
遏襄河賊勢若再事耽延是楊需屢次玩誤朕不能再以薄罰示
懲也逆匪由江入漢竟分兩岸北趨顯係水陸並進昨據陶恩培
奏賊船放入襄河口內爲數不少且有我軍戰艦二十餘隻是該
逆無船可擄之說斷不可信李孟羣等水師僅在外江轟擊亦須
追入內河方能破其藏匿之路其沔陽以上沿河船隻亦應一體
撤赴上游方能絕其搶掠以武昌見在情形而論患不在江面而
在興國通山一路土匪曾國藩等進攻九江連日不知勝負若何
或酌分陸軍以救武昌東路或再添派水師沿江而上協濟李孟

羣等之師使得進剿襄河則上游可冀得手於潯郡事機亦有裨益著卽妥爲籌酌迅速奏聞貴陞實在下落仍著官文確查具奏將此由六百里加緊各諭令知之○諭沈祖懋奏賊匪竄入徽境擾及黟縣一摺正月二十二十一等日賊匪大隊犯石埭之琉璃嶺霧露嶺四川遊擊周天受帶兵迎剿因眾寡不敵致失嶺隘賊由石埭擾及太平縣距歙不過數十里又分隊徑趨黟縣之羊棧嶺二十七八等日另股賊匪攻入黟縣有進犯休甯之信黟縣至徽州府城止一百四十里沈祖懋僅帶練勇二百名在漁亭堵禦此外惟徐榮在徽防堵兵力實形單弱何桂清想已接該學政咨報著卽撥兵赴徽援應堵賊內竄之路並著向榮速飭鄧紹良等撥兵由南路赴黟應援務須前後夾擊以遏逆匪猖狂之勢毋令乘虛深入徽郡爲要將此由六百里加緊諭知向榮何桂清並傳

諭沈祖懋知之○己酉諭軍機大臣等諄齡奏廓番舉動情形一摺廓爾喀國前欲唐古忒認出幫兵使費已屬有意尋釁見復私給干布康松汪堆頂翎到濟隴傳集村民欲接管營官事務巴勒布舊頭人熱瑪松達爾又欲進藏呈遞表章亦與由塘轉遞例案不符居心叵測一切舉動甚屬謬妄惟先後呈遞該大臣稟內並無違悖之詞此次差人赴藏呈遞表章稟信亦似尙知名分此時辦理機宜總當不動聲色嚴密設防該大臣見派噶布伦汪曲結布及糧務張祺等先後馳往後藏定日一帶藉查辦案件爲名暗爲布置如該夷呈遞表文卽飛遞該大臣等照例譯閱如有悖謬干求之語一面據理駁斥一面迅速具奏所有藏屬要隘密加防範之處仍當處以鎮靜不得過事矜張將此諭令知之○曾國藩塔齊布奏潯城一面臨江兩面瀕湖惟東門有陸路可入因於東

門外小嶺下紮一新營開掘地道冀轟城垣詎該逆業已偵知於東城內深掘濠溝添築子城東門外增修木壘暗通城內自正月十四日後日由木壘潛出撲我新營臣塔齊布與諸將熟商乘其屢來撲營設計陷之遂於十八日將新營器物夜中運歸營內暗藏地雷火礮掩以茅草賊眾果於十九日黎明出千餘人撲我地道徧擲火毬新營地雷火礮齊發燒斃賊匪二百餘人賊眾敗潰臣塔齊布督令參將彭三元都司周岐山率各營兵勇追襲斃匪四十餘人其自平嶺來攻者王國才率四川練丁禦之浙江甯紹台道羅澤南率領湘勇自東路直抵平嶺安慶府知府李續賓自北路繞出平嶺之後兩路夾攻追至城根賊眾遁入木壘其伏於寶塔松林中者經羅澤南王國才殲斃百餘名松林之賊盡由老鵝塘奔入九華門三路共斃賊四百餘名生擒十二名此地道停

工設計陷賊大獲勝仗之情形也水師之陷入內湖者輕舟百餘
精卒二千本向來所藉以衝鋒陷陣者也然三板小艇一旦與老
營隔絕座船被燒弁兵饑凍備嘗自開赴江西省撫臣陳啟邁給
以口糧優以犒賞眾心始安繼聞外江被風戰船回鄂老營之相
離愈遠內湖之軍心愈搖臣曾國藩奏明馳至江省親自統帶而
安輯之與陳啟邁商定將江省見造之長龍三十號先撥臣軍應
用又慮春夏水盛江湖並漲非巨艦不足以壓浪而立營擬再造
快礮大船十餘號酌派員弁回楚續招水勇自成一軍期與外江
水師會合夾攻此內湖水師重加整理之情形也探聞湖廣督臣
楊霨於初五日回至漢口逆匪於初七日竄入漢鎮臣等卽飛飭
王國才回援武漢又據探逆黨勾結興國州匪徒復行滋擾並圖
竄入江西武甯縣境撫臣陳啟邁與臣曾國藩熟商王國才回鄂

之師若取道武甯山路則免其蔓延江境而繞出興國之背勦辦亦易復札飭王國才由武甯興國勦洗回鄂此湖北來潯會勦諸軍旋鄂之情形也見今攻圍潯城臣塔齊布仍日日操練以期蓄養精銳水師一軍分爲兩截各自整飭成軍庶幾轉敗爲功上諭水師陷入內湖久與外江聲勢隔絕曾國藩恐兵心渙散馳往南昌省垣親自安輯已與陳啟邁商定將江省見造之長龍三十號調撥應用惟江湖水盛既非巨艦不能壓浪若尙待鄱陽春漲始行衝出恐稽時日急宜與江西所撥船隻合力設法將支河賊踪勦淨駛出湖口以便與外江戰舸聯爲一氣則水陸會攻方能得力見在水師已上援武漢塔齊布陸軍攻勦九江尤爲喫重陳啟邁擬造快蟹各船著卽派員迅速督辦以便與湖南師船會同出江吳錫光所帶兵勇旣難資堵截亦應另行籌撥藉壯聲威王

國才業已由武甯回援武漢繞出興國之背惟該州一帶土匪橫行王國才能否速到武昌尙難豫料而有此一軍剿捕土匪即可稍分武昌喫緊之勢曾國藩續由楚省招募水勇亦恐有需時日必得將湖內長龍一百餘號速圖駛出與塔齊布陸兵會合迅殲醜類克復九江始能與武漢水師聲援聯絡所需軍餉並著陳啟邁就近隨時接濟爲要將此由六百里加緊各諭令知之○諭昨因官文等奏岳口失利當經諭令楊需將派調各兵飛催前進並於進攻漢陽官兵內酌撥改赴上游以遏襄河賊勢諒已遵旨妥辦本日據陶恩培奏賊由襄河渡江直撲省城經官兵擊退水軍進攻漢陽未能得手鄂省兵力本形單弱楊需見派兵勇一萬餘人由長江埠漣口新溝蔡店各路分兵進攻漢口漢陽著卽催令楊昌泗等迅速前進至襄河一帶賊勢蔓延官文所派之兵能否

迅抵武昌殊難懸定楊需等惟有遵照前降諭旨一面進攻漢陽漢口一面抽撥兵勇折赴上游以遏賊蹤至興國通山土匪滋擾最爲省城之患茲據曾國藩等奏稱見派副將王國才管帶兵勇三千餘人取道武甯繞出興國之背一路剿洗到鄂此項兵勇卽著陶恩培就近迎探催提若興國土匪剿除淨盡於省城防剿事機亦有裨益李孟羣等水師能否追入內地與陸兵會合夾擊襄河爲賊艍占踞荆郡情形喫重官文等督兵進剿務須熟籌妥辦並將近日情形迅速具奏四川陝西餉銀前已有旨飭催此項銀兩均由荆襄行走解到時卽著官文楊需陶恩培均勻分用毋得專顧一處致誤軍需將此由六百里加緊各諭令知之○諭曾國藩等在九江水陸屢獲勝仗惟水師船隻被風損壞居多茲據奏稱擬再造巨艦並赴楚招募水勇等語駭秉章已飭紳士丁善慶

等趕造大三板艇五十隻並長龍快船等船此時自己造辦竣工
替與捐辦船廠一併備齊下駛以資曾國藩等江面攻剿毋稍遲
誤將此由五百里諭令知之○諭和春福濟奏移營進剿廬州賊
眾連獲大勝一摺廬郡賊匪向恃南路賊營爲外援經我兵於得
勝門外步步進逼擒斬三千餘眾踏破賊營八處並陣殲逆首陳
宗勝等若再乘勢移營愈逼愈近孤城當可克復惟皖省賊勢蔓
延附近廬州一帶如舒巢等處尙未克復廬州之賊雖被痛剿援
應未必盡絕著一面督兵迅圖攻克廬郡一面將七里站巢湖一
帶分兵駐守毋令得而復失方爲善策若賊去則收復空城賊來
則仍被占踞並或旁竄他處更肆鴟張和春等擁兵巨萬縱寇往
來獲咎更重據奏首逆就誅羣盜無主然該郡渠魁是否實係陳
宗勝城中賊夥尙多克復有無把握和春等不得因有小勝稍存

玩誤至前次賊攻廬州時朕聞實因已革知府胡元煒駐守北門
縋城逃出以致府城被陷巡撫江忠源殉難六安州失守時知州
宋培之亦有開門迎賊之事胡元煒宋培之下落前經降旨飭查
未據和春等覆奏見聞賊匪僞示多有胡元煒宋培之兩人僞銜
是其降逆已屬顯然和春福濟豈皆毫無聞見著迅速查奏並嚴
拏務獲懲辦該撫另片奏鳳潁泗滁等屬錢糧未能輸納擬請儘
徵儘解等語該省疊遭蹂躪民力凋敝自係實情惟行軍以籌餉
爲先見在關稅鹽課等項既多支絀若地丁正項亦任令各州縣
藉端情徵軍需何所取給著除尚未收復奏請緩辦之安廬池太
等府州屬外其餘被災被擾較輕處所仍嚴飭地方官將應徵錢
糧實力催徵如敢藉口遷延卽行從嚴參辦將此由六百里加緊
諭令知之○和春福濟奏河南候補道張維翰潁州府知府陸希

提於上年十二月間在亳州泥臺店等處會拏擒匪張沆禮等一百六十餘名二十三日帶兵赴渦河以南搜捕行至臨河鋪有土匪七八百人攔擁而來陸希提團勇分路前進鏖戰兩時斃匪百餘生擒三十六名間擒首鄧朝軒業於接仗時轟斃續據署蒙城縣知縣劉瀛階等拏獲擒匪郝奉莪白小卽小白漚等兩起共三十八名及擒首貞沅和尚一名均卽正法查潁亳一帶擒匪經官兵前後殲斃不下數千稍寒逆膽惟此輩東拏西竄急難芟刈根株見與袁甲三函商擬再添派幹員前往協助一面咨會英桂牛鑑分別派兵會剿報聞○庚戌諭內閣前據載齡等奏強盜等案請從嚴辦理一摺當交惠親王恭親王奕訢大學士九卿等妥議具奏嗣據刑部遵議王慶雲請覈定搶案罪名及御史唐王森奏請釐剔弊端各摺片均交原議王大臣等議奏茲據惠親王等詳

議以聞朕惟立法貴乎因時安良必先除莠康熙雍正年間辦理盜案將法所難宥情有可原之犯分別正法發遣乾隆年間經大學士會同刑部議將夥盜曾經轉糾黨與等項仍問擬斬決參稽例意原於法外施仁之中仍寓除惡務盡之意立法本極周詳辦理無虞輕縱無如地方官奉行不善每辦一案把風接贓之人常倍於入室接贓之盜甚或將病故在逃之犯指爲法所難宥見獲之犯歸入情有可原以致匪徒漏網無怪盜風日熾嗣後凡遇盜劫之案著照王大臣等所議仍依強盜已行但得財者不分首從皆斬本律俱擬斬決其中把風接贓等犯雖未分贓亦係同惡相濟著照爲首之罪一律問擬此外實在情有可原之犯如年止十五歲以下被人誘脅隨行上盜者仍照本例問擬儻地方官仍蹈積習或另設名目巧爲開脫一經發覺卽照諱盜例嚴行參辦至

搶奪之案總以人數多寡及有無兇器爲斷如果糾眾夥謀持械
接掠兇暴情形與強盜無異若不從嚴懲辦勢必釀成巨案亦著
照所議凡聚眾持械搶劫兇暴眾著者無論白晝昏夜均照強盜
本律不分首從一概擬斬以儆兇頑而靖地方經此次嚴定章程
之後各該地方官務當力圖整頓有案必懲用副朕執法持平明
慎用刑之至意其吏兵二部所擬獲犯保舉及諱盜處分均依議
行至尋常盜犯業經就獲自應按律懲辦御史唐王森請照格殺
勿論之例准州縣便宜從事殊非慎重刑章之道著毋庸議○諭
軍機大臣等前因有人奏吳健彰通夷養賊各款當降旨交怡良
吉爾杭阿按照所參情節逐一嚴審定擬罪名具奏並諭黃宗漢
派員訪查茲據黃宗漢奏稱查明吳健彰實與賊首劉麗川同鄉
該逆起事時吳健彰眷屬奔避夷館庫中存銀悉爲賊有並與夷

人夥開旗昌行及所雇船勇俱係粵人每有攻城之舉往往漏洩致船勇與滬城之匪暗通信息各情惟道庫存銀是否三四十萬吳健彰所雇挖罟船價曾否於關稅取償其徵收關稅有無捏報隱匿並夥開旗昌行有無約據其上火輪船與逆匪如何談論貨船漏稅實有若干銀兩未得確據怡良近在蘇省見聞切近吉爾杭阿與吳健彰同在上海日久更難諉爲不知該道擊問已久尙未據該督撫將原參各款查明具奏見在上海克復所有應訊人證不難傳集著卽逐款查明並此外有無別項劣蹟一併確查據實參奏毋稍徇隱原摺著鈔給閱看將此由四百里諭令知之○諭黃宗漢奏遵查交辦事件並陳徽甯防剿情形一摺前因王茂蔭奏請將徽郡暫歸浙省管轄當經諭令黃宗漢悉心籌畫並查辦知府達秀被參款迹茲據奏稱該督在浙撫任內於該郡撥兵

籌餉事宜皆經通融辦理若必改歸管轄於地方公事權難歸一
自未便輕議更張達秀業經病故局務另行整頓嗣後收捐款項
著何桂清飭令該府縣等認真覈實無任冒銷黃宗漢所奏徽甯
防務已與近日情形不同前據沈祖懋奏股匪攻入黟縣聲言欲
犯休甯當諭令何桂清撥兵赴援諒已遵旨辦理見在該處帶兵
防堵有徐榮恩禧周天受等著卽飭令協同堵禦保徽卽以保浙
何桂清務當不分畛域力杜內竄之路所需軍餉仍源源協濟毋
稍貽誤至徽甯兩郡每月防費不貲並著責令徽州府李純甯國
府鄧瀛等勸諭紳富實力捐輸所有錢漕正課設法徵收藉資接
濟將此由五百里諭令知之○辛亥諭內閣惇郡王奕諱恭親王
奕訢均著加恩賞穿黃馬褂○壬子諭軍機大臣等楊需奏進攻
漢陽漢口獲勝並分剿繁馬口等處賊匪情形一摺官軍連日分

投進勦雖據報各有斬獲而傷亡兵勇甚多漢陽漢口並未克復
岳家口仙桃鎮之賊亦未能勦除淨盡賊勢各路蔓延亟圖上竄
北岸天門等處僅有守備穆祖索明等督帶兵勇勦辦殊形單弱
著楊需飛飭楊昌泗帶兵與劉富成會合前進並著官文飭令魁
玉錫齡阿會督兵勇無分南北岸併力夾擊杜賊上竄之路或尙
須添撥兵勇俾敷攻勦仍著官文楊需妥爲調派毋稍疏忽李孟
羣等進攻漢陽均以賊匪鈔襲未能攻入見駐武昌兵勇足資援
應著陶恩培飭令胡林翼等斟酌情形渡江協勦以期及早收復
此時兵勇旣已分路進勦楊需自應飛速前進臨陣調度斷不准
株守德安致滋貽誤另片奏請飭山西陝西四川按月籌餉五萬
兩等語見已諭知各該省籌解仍著官文等於解到後分撥應用
毋得專顧一處所請撥高唐兵丁俟竄往馮官屯之餘匪殲盡當

卽酌撥前往昨據軍機大臣議覆禮部侍郎杜翻奏請汰冗兵一摺內稱各省徵調官兵未必盡皆精銳應由各省督撫及帶兵大員於徵調之初到營之後認真簡閱裁汰疲弱等語自爲撙節軍餉起見著官文等按照所議認真辦理毋得視爲具文原摺著鈔
和閱看將此由六百里加緊各諭令知之○諭逆匪回竄湖北占踞漢口漢陽等處見已厚集兵勇分投攻剿所需軍餉刻不容緩並省城戰守兵勇及添募水勇修理船隻等項費用在在均關緊要著樂斌王慶雲載齡安速籌畫源源接濟按月撥解見當該省剿賊喫緊之時斷不可以無款可籌一奏塞責致誤要需其前兩次撥給湖北川餉並著該督迅速催解毋稍延誤將此由六百里各諭令知之○癸丑荊州將軍官文等奏逆匪攻陷天門等處已添派兵勇堵剿旋經兵勇克復天門縣城擊退襄河兩岸賊匪報

聞○子浙江被戕鹽大使傅垣祭葬世職○甲寅子江西陣亡巡檢許道卿等祭葬世職○乙卯諭內閣惠親王軍機大臣會同刑部具奏定擬勝保罪名一摺已革都統勝保經朕特授爲欽差大臣勦辦逆匪自賊踞高唐州後勝保帶兵圍攻九月有餘未能克復糜餉勞師罪無可追惟念勝保前由揚州帶兵解懷慶之圍追賊山西不遺餘力其另股賊匪由山東臨清竄出後復沿途追勦直至江蘇豐縣悉數殲除尙屬著有勞績勝保著照擬於斬罪上減等發往新疆效力贖罪○諭軍機大臣等前因襄河賊匪上竄岳口官軍失利曾諭曾國藩等或酌分陸軍或添派水師折回會剿嗣據曾國藩等奏整頓水師情形並湖北赴潯協剿官軍已先後回援復諭令該侍郎等迅將陷入內河各船設法駛出爲水陸夾擊之計該侍郎等諒必籌畫盡善不至顯此失彼茲據侍郎王

茂蔭奏賊以九江爲扼要故用全力守之曾國藩等不可回救武漢亦不可多分兵力等語見在塔齊布圍攻九江並未撤兵王茂蔭尙未知悉且不知此時荆襄緊急武漢兵勇不能得力有不得不分兵援應之勢其所稱由間道入江西從南康星子水陸橫衝而出內外夾攻亦尙未知曾國藩已抵南昌蕭捷三等師船尙在都昌一帶軍情移步換形固不容專顧一隅亦豈可處處受賊牽掣曾國藩塔齊布仍遵疊奉諭旨迅圖克復九江則上下游江路自通賊踪可斷其應撥兵回援及如何前後兜剿之處均著妥速籌辦王茂蔭摺是否有可採擇卽著酌量辦理又軍機大臣議覆禮部侍郎杜翻奏請裁汰冗兵一摺內稱各省徵調官兵未必盡皆精銳應由各省督撫及帶兵大員於徵調之初到營之後認真簡閱裁汰疲弱等語自爲撙節軍餉起見著曾國藩塔齊布按

照所議妥爲籌辦並知照陳啟邁一體懷遵辦理原摺各一件均著鈔給閱看將此由六百里諭令知之○丁巳陝甘總督易棠奏抽釐流弊滋多甘肅礙難辦理得旨既有窒礙著不必行○戊午諭內閣恭親王奕訢等奏訊明職官違例放債並宗室大員借貸屬員銀錢各情分別定擬一摺此案已革內管領達魁達謹身係職官輒敢舉放利債指扣兵丁錢糧復夥同木商承買木植實屬目無法紀達魁達謹均著從重發往新疆效力贖罪所有該革員等查封財產及玉田縣地畝著一併查鈔入官已革外委司泳茂派辦木植變價輒敢屬令木商短寫價值欲行侵用著從重發往軍臺效力贖罪已革馬蘭鎮總兵宗室慶錫於司泳茂承辦木植起意詐贖未能查出已屬形同讐贖復向達魁借用銀錢種種乖謬著從重發往黑龍江充當苦差解任工部員外郎宗室耆英於

伊子慶錫在朝陽門外違例設立馬撥並不阻止復令遞送信件
實屬悖謬著卽革職圈禁半年仍罰養贍錢糧六箇月解任通政
司參議慶賢於伊兄慶錫差令官弁來家伺候紮營違例容畱並
給該弁銀物殊屬不合著交部議處○諭軍機大臣等前因沈祖
懋奏賊入黔縣聲言欲犯休甯諭令何桂清撥兵援應力杜內竄
茲覽何桂清奏報漁亭失利道員徐榮督戰陣亡該逆雖未越過
休甯有欲分竄屯溪之信徽郡賊氛日偪剿辦更形棘手且此次
接仗實因徽勇先潰以致逆匪與土匪乘機勾結愈肆猖獗未知
該府縣兩年以來所謂設防者安在實堪痛恨見在巖鎮有恩禧
等駐紮七里頭一帶有魁齡等堵截當乘賊匪未越休甯之先扼
其來路方不至旁竄屯溪等處並飛飭赴徽之知府石景芬接辦
防務督率向榮前派之周天受江長貴等所帶川兵及該撫續派

之陳貴華等見有兵勇隨時確探合力進剿勿令深入內犯以固
 浙省藩籬徽州素稱富饒兼有險隘可守該地方官既不嚴督紳
 富實行團練亦不豫籌濟餉言守則專恃客兵聞警則盡行遷徙
 以完善之地任賊來去自如該撫所稱必須主客同心方能濟事
 固屬實情已諭令怡良和春福濟嚴飭該府縣等將練勇籌餉事
 宜實心辦理不得專恃鄰省濟兵濟餉何桂清仍當不分畛域力
 圖援應其聯絡團練勸諭捐輸徵納錢漕等事仍一面責令李純
 鄧瀛妥速經理如該府縣仍前玩泄並紳士等不肯協同籌辦但
 顧身家卽著從嚴參辦將此由六百里加緊諭令知之○諭徽郡
 爲南路要隘疊經諭令該地方官會同紳士舉辦團練如果平日
 辦事妥善何至賊鋒甫至卽行潰散可見該地方官於防剿事宜
 並未悉心經理徽甯紳富亦未能實心出力保衛鄉閭專恃浙省

及江南大營分撥之兵藉資堵禦見在賊勢猖獗浙省既不能多撥兵勇屢次代籌糧餉卽江南大營官兵亦勢難多撥怡良福濟均有地方之責著卽嚴飭該管道府州縣及紳士等激發天良團勇集貲協力堵禦如有因循不振貽誤地方者卽著從嚴參辦和春福濟攻剿廬州賊匪前已踏毀賊營附城合圍卽日諒可克復此時徽郡情形萬分喫重和春等務當悉心籌畫設法援應不得以南北隔絕勢難兼顧爲詞自圖諉卸前據王茂蔭奏請飭已革江西巡撫張芾前往徽甯一路籌辦團練防堵事務等語著和春等酌量情形奏明辦理將此由六百里加緊各諭令知之○諭楊需奏賊匪大股上竄連日進攻情形並扼要截擊一摺覽奏實深憤急該督自賊由黃梅回竄節節退避追賊踞漢鎮復株守德安屢次諭令迅速進攻而月餘以來毫無布置所派兵勇遇賊輒潰

以致該逆窺我虛實紛紛上竄該督遷延貽誤罪無可辭此時逆賊欲窺伺襄陽該郡北接河南儻稍有疏虞致逆賊勾結豫省土匪肆行猖獗爲害愈烈該督見馳赴隨州一帶意在迎頭遏截但賊勢剽疾所稱派兵於山徑埋伏截剿亦恐不足深恃且賊情詭譎往往避實擊虛德安雖輕於襄陽楊昌泗收集之兵勇是否足資堵禦楊需惟當確探賊蹤就見有兵勇酌量調度以遏賊鋒斷不可任賊蔓延所調四川兵勇已諭令樂斌迅速派赴楚北並諭札拉芬帶兵由潼關前往該督務卽飛速迎提再高唐裁撤川勇已據崇恩奏派楊熙等管帶資遣回籍該督亦可酌量截畱以厚兵力前據官文奏襄河南北兩岸擊賊下竄荊州情形如果稍緩亦可分撥兵勇與楊需會合進剿逆匪大股上竄則漢陽漢口賊巢自必空虛陶恩培亦當督飭胡林翼李孟羣水陸諸軍乘勢進

勦儻能得手即可分投追擊使該逆首尾不能相顧勦辦較易爲力楊需督兵勦賊既不能杜賊回竄若再令該逆擾及襄陽朕惟執法從事決不寬貸所有見在賊情著該督等迅速馳奏以慰懸繫將此由六百里加緊各諭令知之○諭前因逆匪回竄湖北占踞漢口漢陽等處疊經諭令楊需等厚集兵勇分投攻勦本日據楊需奏進攻漢陽官兵傷亡甚多本月十三等日有賊匪數千竄至漢川並竄新溝地方其兇悍之賊分道由漢川應城等處小路竄上竄儻直達襄陽該郡恐爲所襲等語見在楊需由隨州一帶迎頭截擊如上竄之賊徑犯襄陽該郡兵勇爲數無多恐難抵禦著扎拉芬接奉此旨後卽帶兵前赴湖北與楊需等會同攻勦探明襄樊等處何路緊急卽由何路進攻以勦爲防該將軍務當確切偵探相機進勦毋稍遲延並著將帶兵啟程日期及探報楚省見

在情形先行由驛具奏將此由六百里加緊諭令知之○諭本日
已諭令扎拉芬帶防守潼關官兵赴湖北襄陽一帶援剿所有楚
陝毗連要隘應如何嚴密設防之處並著載齡確探賊蹤相機調
度毋稍延誤將此由六百里諭令知之○諭楚北賊匪由應城所
屬西竄擊獲賊眾有該逆悉索兇悍之黨意圖徑犯襄陽欲與豫
匪勾結等語胡林翼李孟羣等水陸各軍尙在沌口一帶楊需派
楊昌泗防守德安自帶兵勇馳赴隨州意恐該匪由應城間道竄
出安陸天門之上爲迎前截遏之計是襄陽十分喫重該處地接
河南平曠無險楊需等所帶兵勇屢經潰散果否能遏逆氛尙無
把握而德安北邇三關各屬上年曾遭蹂躪城空地瘠卽楊昌泗
兵力亦單恐未能抵禦英桂昨奏已飭南陽府會同在防將備堵
守此時河南邊界毗連襄陽德安兩郡地方較前喫緊該撫前派

邱聯恩移師紮營信陽州之西雙河居中調度原爲控制三關策應南陽起見著卽嚴飭該鎮將等將南路邊防嚴密布置一面偵探賊蹤隨時援應勿令逆匪北犯英桂近在陳州更應探明何路緊急馳往堵剿不得稍存大意致有疏虞將此由六百里加緊諭令知之○予安徽陣亡道員徐榮祭葬世職○調四川兵勇各一千名赴湖北剿賊○己未諭內閣慧成奏糧臺大員不應越分保薦並密陳托明阿忠介勇敢公正不阿爲緩急可倚之良臣等語托明阿係朕特簡統帥豈有不知其人何待慧成保奏至所稱托明阿保薦多而參劾少請朕加以策勉則更爲全才尤屬膽大慧成係革職自效之員止應聽候該大員差委乃敢妄加評騰竟以監軍自居有乖體制謬妄已極至糧臺藩臬大員原准奏事遇有本營軍餉事宜及特旨交辦事件豈能一律會銜具奏卽間有保

奏隨員之案是否允准朕自有權衡何待該革員曉曉瑣瀆慧成
著傳旨申飭○諭軍機大臣等英桂奏楚北逆氛復熾豫省邊防
喫緊一摺逆賊占踞漢陽等處官軍疊次進剿未能得手該逆由
應城上竄逼近南陽豫省素多捻匪儻逆匪北來勾結貽患非輕
該撫見已由陳州馳赴信陽相機布置惟豫省兵勇疊經調赴正
陽六安並以各屬土匪滋事紛紛調撥見在邊防萬分喫緊在防
官兵過於單弱自應迅派重兵前往遏賊北竄著僧格林沁於所
帶官兵及勝保前存兵丁內挑選馬步兵三四千名派委得力大
員統帶星速馳赴河南交英桂調遣毋得稍涉延緩至調撥以後
大營兵力或恐不敷東省官兵有得力可用者即著歸併大營協
剿如東省官兵可以徑赴河南亦著斟酌辦理總期一律精銳毋
許稍有老弱致滋貽誤該官兵啟程日期並著迅速馳奏馮官屯

餘匪無多豈容任其久踞十數日來未接奏報實深焦念著僧格林沁等督飭兵勇迅速進攻務將該匪卽日悉數殲除俾南賊聞風膽落不至再圖北竄將此由六百里加緊諭知僧格林沁並諭令德勒克色楞西凌阿崇恩知之○諭本日據英桂奏楚北逆氛復熾見飭南路加意戒備等語該逆由應城上竄非西犯襄陽卽北竄南陽楚豫交界防堵萬分喫緊邱聯恩雖見駐信陽所帶之兵僅有七百餘名各路防兵亦皆單弱本日已諭僧格林沁等於大營內挑選精兵三四千名派委大員管帶並速馳赴豫省聽候英桂調遣矣該撫偵探賊蹤何路喫重卽飛催帶兵大員馳往何路策應斷勿令賊匪竄入豫境勾結蔓延惟北兵抵豫尙需時日英桂見赴信陽其各路防兵有可移緩就急之處或添募壯勇激勵鄉團務當妥速布置加意堵截不可專待北兵致誤事機其德

安失守之信是否屬實仍著確探速奏所請接濟經費已飭令戶部迅速籌議矣將此由六百里加緊諭令知之○于湖北陣亡荊州副都統賈陞祭葬世職○庚申和春福濟奏查署宿州知州郭世亨曾任蒙亳地方於情形自必周知臣福濟履任之初臣和春亦統兵來皖沿途採訪察看年餘郭世亨緝捕之長究不及撫綏之善宿民因其慈祥愷悌悅服頗深較之在蒙亳時尤著循聲至潁亳勦辦捻匪固關緊要知府陸希澍不避艱險駐亳籌防疊有斬擒實能勝任前此袁甲三奏請以郭世亨王啟秀二員分別開缺委署事前本未會商拜摺後方行咨照及奉旨飭令與臣等安議伊函稱如意見相同卽會銜否則單銜具奏臣等公同函覆以宿州係南北關鍵郭世亨素得民心藉資捍衛不可驟離詎袁甲三堅執前言單銜覆奏並將臣等不肯更易之詞全行抹煞止以

前後稱美浮言濫瀆

聖聽

臣

等如隨聲附和見好同僚下無以

對黔黎上無以酬

高厚查知州王啟秀在宿止能幫辦未可獨

當一面再四籌思更易則彼此無益仍舊則官民俱安其潁州協

勦仍應派張家駒前往會同陸希湜勦辦至袁甲三此次來函堅

持己見百折不回

臣

等無從會銜又奏袁甲三統帶兵勇以來從

不自請撥餉過者動輒截留用款亦不咨報藩司顯有不實不盡

查各州縣雇募防勇

奏

每日制錢百餘臨淮距賊尙遠事同一例乃

袁甲三竟照人營征勇日給一錢五分以此冒銷私肥囊橐無怪

道路之口開傳其油簍藏銀派勇送陳州本籍半途遇盜言者稱

快信任劣員候補同知李安中妄陳鹽務設卡巡河擾害閭閻強

勒小戶捐輸敲骨吸髓以致民間怨恨

臣

等受恩深重不敢不據

實密陳

上諭內閣前因袁甲三奏請將安徽署宿州知州郭世

亨開缺專辦蒙亳等處捻匪並請以補用直隸州知州王啟秀接署宿州知州朕以地方公事應由該撫覈辦批令會同和春福濟具奏嗣據袁甲三奏稱和春等函令單銜入奏茲據和春等奏袁甲三接奉批摺後仍堅持已見無從會銜並稱宿州地方緊要請畱熟手接辦無庸更易以期官民相安自係實在情形所有郭世亨王啟秀開缺接署之處著無庸議各省辦理防剿大員遇有官吏廉能出眾者原准保奏貪污不職者亦許糾參惟於升補委署總應會商地方大吏豈容擅自更調袁甲三經朕屢次批諭輒敢固執不遵又敢飾詞具奏以遂其專擅之私實屬大負委任都察院左副都御史袁甲三著先行交部嚴加議處卽著來京候旨至所參袁甲三擅截餘銀冒銷肥己等情著和春福濟確切查明據實具奏○諭軍機大臣等和春福濟奏知州未可更調並請飭臨

淮南派兵勇仍駐亳州各摺片陸希湜於潁亳一帶剿匪事宜既據該提督等察看實能勝任卽著責成該府會同張家駒認真剿辦其郭世亨王啟秀二員已明降諭旨毋庸更調以資熟手張家駒所帶兵勇係由臨淮派赴亳州見在該處既有捻匪劫奪礮位甚至文武均各受傷此項兵勇著卽畱於亳州務將此股捻匪悉數殲除免致蔓延勾結臨淮控制全河爲南北要衝雖據該提督等聲稱距賊尙遠而滁州全椒等處路徑紛岐前年逆賊長驅北犯實因臨淮無人扼守所致見在袁甲三已交部嚴加議處飭令來京其所帶兵勇斷不可竟行裁撤著和春等酌委得力大員前往接替毋得稍涉大意廬州賊情旣形窮蹙亟應趕圖克復俾大兵得以分路搜剿毋再延緩另片所參袁甲三舉錯乖方各情如浮支兵勇口糧及油簍藏銀寄回原籍等款是否確有實據著和

春等確切查明據實具奏再前據軍機大臣議覆禮部侍郎杜翻奏裁汰冗兵一摺內稱各省徵調官兵未必盡皆精銳應由各省督撫及帶兵大員於徵調之初到營之後認真簡閱裁汰疲弱等語自爲撙節軍餉起見和春等所帶兵勇已閱年餘有無應行淘汰之處著照所議嚴查妥辦原摺著鈔給閱看將此由六百里諭令知之○辛酉諭內閣前據慧成奏糧臺大員越分保薦有礙大體等語朕因糧臺藩臬大員遇有關涉本營軍餉事宜原准奏事慧成係革職之員不應越分言事且有評隲統帥大員之語當經降旨申飭本日據托明阿等奏稱藩司文煜接辦糧臺保奏李樹穀有意討好與慧成適相符合顯係該革員從中慫恿此種詭譎伎倆難逃朕鑒托明阿身爲統帥若文煜所保不公卽當早行參奏何以遲至數月之久始行入告又稱文煜於沙頭案內奉旨准

保各員係藩司專摺奏請不敢妄參未議隱約其詞殊失大臣進言之體托明阿陳金綬雷以誠均著交部議處文煜保舉李樹穀旋經雷以誠奏參該員製造軍械草率取巧業經降旨革職可見所保不實文煜著一併交部議處糧臺大員原准奏事惟自糧臺移設揚州與距大營較遠者不同嗣後文煜遇有舉劾糧臺各員著與托明阿會銜具奏此次沙頭案內准保人員係屬勦賊出力更非糧臺可比著托明阿查覈彙奏該大臣等當此軍務孔亟之時務須一秉公忠於事有濟毋得各執己見致干重咎○僧格林沁等奏逆匪竄至馮官屯占踞臣等因該逆拌死抗拒兵勇難於逼近將運到大礮四面安設向內轟擊村內房屋皆被擊塌該逆狡悍異常因房屋不能棲止在村內掘挖土濠盤旋三匝可由地下通行卽於溝內掘窖潛藏以避礮火圍濠之外復挖小孔逆匪

伏於地下向外瞭視俟我軍逼近烏槍可及之處卽向上開槍是以日日進攻兵勇皆有傷亡未能得手伏思此股逆匪止數百人見被重兵圍困竟不能迅速蕆事訊據投出之人供稱村內糧米充牣逆匪足數日用臣等展轉籌度擬用水灌或可奏功因馮官屯外舊有河形可以引水當經委員詳細履勘溯查來源據稟馮官屯旁舊有漢河可通徒駭河若由上河廳三孔橋挑開引放運河之水始能灌入惟挑墊築壩處所均應妥爲修理以免泛濫旁洩等情見已移咨東河總督山東巡撫設法辦理如水勢暢旺馮官屯雖不能淹沒而周圍濠內必可滿溢該逆旣難潛匿必拌命出鬪當可卽時掃蕩仍一面激勵兵勇趕緊進攻斷不敢藉候引水稍涉遷延見在該逆每夜出巢竄探李開芳時親向義勇等巧言引誘以冀要結眾心俱被各勇槍礮擊回上諭軍機大臣等

該大臣見擬由上河廳三孔橋挑開引放運河以水灌賊此計未免迂緩且恐辦理稍不周妥或有泛濫旁洩之虞轉使該逆有險可恃該大臣務當斟酌妥善一面迅速辦理仍一面設法進攻毋令負嵎久踞逆賊詭譎多端慣於勾結此次義勇雖將該逆擊回仍當隨時稽查奸細毋令潛相煽惑以致窺我虛實將此由六百里加緊諭知僧格林沁並諭德勒克色楞西凌阿崇恩知之○托明阿等奏定擬軍流人犯張懋德等被賊勒送禮物實因懼禍圖全並非甘心賂賊情願捐貲贖罪得旨見在賊氛正熾懲勸最宜分明該商等既肯饋賊何不捐貲保衛鄉閭免死發遣已屬從寬所奏著不准行○以已革刑部右侍郎基溥爲太僕寺卿○王戌諭內閣王茂蔭奏請暫緩臨幸御園一摺見在並未傳旨於何日幸圓明園不知該侍郎聞自何人當令軍機大臣傳問王茂蔭堅

稱得自傳聞未能指實殊屬非是在廷諸臣陳奏事件如果確有見聞朕心虛衷採納若以道路傳聞率行入奏殊失進言之體王茂蔭身任大員不當以無據之詞登諸奏牘著交部議處原摺擲還○是月緩徵福建雲霄等二十七廳州縣暨羅溪縣丞所屬被擾地方額賦安徽亳州等十九州縣被災被賊地方額賦並屯坐各衛丁漕銀米有差

東華續錄

咸豐四十六

臣王先謙敬編

臣陶潛宣恭校

三月癸亥朔祀先農親耕藉田○閩浙總督王懿德奏閩省商茶擬請設關徵收下戶部速議尋議奏閩省崇安等州縣爲產茶盛旺之區自閩省暫開海禁運道便捷各商赴閩愈多所請附省扼要處所及界連粵東浙江等處分設關卡徵收茶稅應請准其照辦專款存儲三月奏報一次聽候部撥試辦一二年後奏明定額永遠遵行從之○甲子諭內閣葉名琛柏貴奏海豐縣城被匪攻陷旋經收復一摺上年閏七月間廣東賊匪攻陷海豐縣城經署陸豐縣知縣陳景輅等帶兵往剿在平岡口等處疊次斃賊一千三百餘名收復縣城嗣竄匪糾眾復徧縣城經護碣石鎮總

兵何芳等督飭員弁分路進剿斃賊無數生擒鍾阿夏等二十三
名將橫山庵等處匪鄉盡行焚燒收復長沙礮臺署通判許錚身
等分往太平剿捕亦斃匪三百餘名其鮎門礮臺亦經署都司蔡
先攀等會同紳士克復各路匪巢俱已一律焚毀仍著該督等嚴
飭文武員弁按捕淨盡毋畱餘孽○諭葉名琛柏貴奏番禺縣屬
河面匪船闖駛省河疊經擊退獲勝一摺廣東省河之南番禺縣
屬沙灣茭塘等司一帶河面匪船滋擾經葉名琛等派令守備黃
彬等帶勇堵剿該匪復敢駕船三百餘隻駛進大石柵口欲圖襲
我勇船黃彬及水師遊擊曾琪等分投擊毀賊船二十餘隻斃匪
八百餘名剿辦尙爲得手仍著葉名琛等督飭將弁兵勇趕緊剿
除淨盡毋使蔓延在事出力人員准其擇尤保奏候朕施恩○諭
向榮奏截剿分竄高資賊匪蕩平賊壘一摺瓜州賊黨於二月初

九日由鮎魚套夾江竄至高資一帶經余萬清虎嵩林兩面分剿擊殺賊目一人並斃賊百餘人該匪復於初十日沿江築壘我軍奮勇殺入賊陣斬馘無算立將賊眾二營踏平敗匪竄至句容縣高家邊復經向榮派總兵德安前往攔截將賊營衝出之騎馬紅衣賊首砍落馬下餘賊慌敗官兵直逼賊濠虎嵩林等由東路攻至東方橋斃賊多人二十日賊分五股由北面撲營並從江邊另股鈔出劉開泰親督兵勇砍倒大黃旗數桿追殺賊匪百餘人生擒六名其鮎魚套口賊簿高資港內賊划亦經我軍連日拆毀並轟沈賊船七隻著向榮飭令余萬清乘勝攻克鎮江郡城並令虎嵩林等實力會剿毋令他竄○諭前據刑部議覆王慶雲奏發遣新疆官犯准其捐輸改發內地當降旨令查明原案情節奏明請旨原以發遣官犯情節輕重不同若概令犯罪較重之員紛紛捐

請寬典倖邀尙復成何政體茲據載齡奏請停止捐改內地章程一摺所奏甚是所有發遣官犯捐改內地章程著卽行停止○向榮奏二月初四日探有賊踞南陵之牛角井糾合六里丁之賊共四五千來犯涇邑遊擊楊瑞乾帶勇從旁衝入將賊隊截爲兩段殺賊頗多先派埋伏義勇並將賊踞之戴家墟焚襲該逆驚潰敗回六里丁涇太已無匪蹤十三日連接浙江撫臣何桂清兩函我軍在漁亭堵剿失利初三日都司許上達奮往直前力戰陣亡該逆竄至休甯有分擾屯溪之信請撥勁兵赴徽並由威坪地方援堵以扼入浙之路臣查該逆垂涎蘇浙曾屢犯東壩黃池均被我兵挫敗今既竄擾徽州逼近浙中則東南全局皆震且係大營糧臺後路尤關緊要當卽飛檄楊瑞乾帶領義勇七百五十名由甯國繞赴浙省威坪會同各軍堵紮要衝再由浙出剿徽境之賊

並於金陵撥兵五百名交都司馬永清管帶由蘇入浙聽候撫臣何桂清調遣因思革任巡撫許乃釗兩載在營頗知賊情又係浙人明於該省地利業令星馳赴浙與何桂清籌商堵剿機宜至都司許上達力戰陣亡殊堪憫惜相應請旨飭部從優議卹又奏正繕摺聞續接浙江撫臣何桂清函稱徽州已於十三日失陷此時浙江倍加緊急已檄令鄧紹夏添帶楚兵五百名由黃池兼程赴浙飛咨浙撫即將各路防剿兵勇併歸鄧紹夏統帶以專責成

上諭軍機大臣等逆匪久欲窺伺蘇浙見既竄擾徽州逼近浙省於東南大局關係緊要何桂清前派石景芬等帶勇馳往此時當已抵徽向榮見飭楊瑞乾帶領義勇繞赴浙省威坪會同堵剿並於金陵抽撥川兵交馬永清管帶由蘇入浙復令鄧紹夏添帶楚兵由黃池赴浙統帶各路兵勇自可與浙省合力救援徽郡該郡

爲浙江門戶著飭鄧紹良迅速馳往扼截勿稍延緩許乃釗准其
前赴浙江與何桂清會籌防剿事宜至金陵兵勇抽撥較多怡良
著仍駐常州扼守蘇杭前路徽州距蘇尙遠該督此時毋庸卽行
回省仍一面嚴防金陵鎮江南竄之賊一面多設偵探察看情形
緩急再行酌量進止吉爾杭阿雖在向榮軍營亦可與怡良督飭
在省藩臬大員嚴查奸細以杜勾結不可稍存大意徽州賊勢及
浙省見在如何布置情形著何桂清隨時奏報以慰懸繫將此由
六百里加緊各諭令知之○諭葉名琛等奏省城北路殲賊殆盡
西路剿賊獲勝並番禹海豐等處均獲勝仗惠來竄出之賊亦經
官軍截殺廣東剿捕事宜似有頭緒惟所奏情形尙係十一月以
前距今又逾數月各屬匪徒想可漸次掃除而此次摺內未據提
及肇慶韶州潮州等處作何剿辦朕心實深懸繫著穆特恩葉名

琛柏貴迅卽乘勝攻勦盡殲醜類並將各路軍情詳細入奏其附近江西湖南一帶是否尙有匪蹤亦著隨時確探奏聞以慰殷念本日據王懿德奏潮州等處道路已通所有調撥赴粵之精兵一千名見已飭令臺灣鎮總兵呂大陞統領改由平和陸路前進已於二月十一日全數啟程其前次慶寅管帶官兵亦於上年十一月由海道赴援著該將軍等飛速迎提以期厚積兵力早殄逆氛見在英德清遠等縣驛路尙有阻梗仍須設法疏通勿再延緩將此由六百里諭令知之○予江南陣亡道員劉廷鏌等廣東陣亡知縣羅才綸等祭葬世職○乙丑 上奉 皇貴太妃啟鑒謁西陵詣 皇貴太妃行宮問安至還宮皆如之○楊需奏 臣二月二十五日接藩司胡林翼鹽法道常恩稟十二三十六等日漢陽之賊至沌口攻撲胡林翼營盤均經擊退十七日早賊匪分股

攻撲省城漢口賊船渡江攻撲塘角省城兵勇水陸堵禦自辰至未鏖戰四時之久眾寡不敵賊匪乘勢入城常恩於城外白沙洲督兵力戰胡林翼督兵擊退前後撲營之賊見省城火起水師戰船全行上駛不能渡江撫臣陶恩培於十七日午刻與護臬司署武昌府知府多山遊擊陶德壽同時力戰陣亡臣聞信之下痛憤交加竊念自廣濟挫敗以來原慮省城兵力太單賊匪剽悍思急攻漢陽以援省城因調兵不能驟集致省城失守實屬罪無可追相應請旨將臣從重治罪至胡林翼王國才石清吉等兵勇約計雖有六七千人惟糧餉缺乏急須接濟且賊眾兵單金口南岸恐難駐紮若湖南可以就近撥餉金口尙能紮營則相機進剿若不能紮營則設法渡江上扼漢川等處以固荆襄門戶總期阻遏狂氛勿令紛竄官文載增奏據布政使胡林翼稟興國通山嘉魚各

匪於十七日攻陷省城撫臣陶恩培等遇害該司因奉檄在漢陽縣屬沌口防勦隔江三十餘里無船可渡李孟羣彭玉麟各紮梁山合兵遏賊上竄並籌商水陸進剿之計統計水陸各軍尙有萬餘待餉甚殷請速撥兵餉以保全大局等情臣聞信之餘五內焦急當飭署荊宜施道莊受祺湊撥銀七千兩錢四千串先行接濟但所需甚鉅惟有仰懇天恩迅催山西陝西甘肅四川各省應撥餉銀星夜馳解來楚又據京山天門鍾祥沔陽等州縣稟稱漢川賊眾竄入府河由長江埠於二月十六日攻陷應城縣分股欲撲德安等語查應城爲適中扼要之地與安陸襄陽荊州各相距不遠且民船多藏府河之中儻爲賊擄難保不分擾上游前已派魁玉等扼要堵剿而上游兵力實形單薄應請旨飭湖南撫臣迅撥水陸各軍由岳州分路應援並籌餉先爲接濟再請迅派川兵

來荆由外江內湖並下與督臣兵勇會合兜擊庶不難剿洗賊蹤
又奏楚北省城不可無大員鎮定見值軍務事繁刻不容緩臣等
與督臣又各處一隅勢難兼顧所遺湖北巡撫員缺請旨迅賜簡
放以資鎮定惟到任需時所有巡撫關防可否卽令藩司胡林翼
暫爲代理上諭內閣官文楊需奏武昌失守撫臣殉難各等語
覽奏殊深憤懣逆匪上竄漢口武昌省城兵力本單嗣因胡林翼
李孟羣等水陸赴援屢有勝仗方冀危城克保乃該逆遽由興國
通山沌口塘角等處四面攻撲官兵竟日鏖戰眾寡不敵以致省
城失陷巡撫捐軀楊需以總督統領全軍自退至漢口後疊次進
攻毫無把握此次省城被賊環撲又不能迅速救援卽按律懲辦
亦屬罪無可追惟見在江北一帶防剿需人該督業已革職著仍
暫留本任戴罪自效如再不將回竄逆匪一律肅清迅圖克復致

令逆蹤擾及上游或久踞武漢卽行從重治罪決不寬貸○諭僧
格林沁等奏勦辦逆匪情形一摺馮官屯賊匪於二十八日潛行
出巢向西南奔撲經我軍槍礮擊回未容竄出次日該逆開挖地
道撲上礮臺雖經該大臣等督兵奮擊仍退回巢惟勇兵陣亡三
十餘名受傷者甚多實屬疏於防範僧格林沁著交部議處○諭
副都統德興阿奏革員擅用關防一摺慧成係革職人員在揚州
軍營效力乃敢與欽差大臣托明阿等會銜行文並擅用辦理防
勦事務閩浙總督關防調遣帶兵大員謬妄已極慧成及伊子晉
康著托明阿一併飭令回旗毋庸再畱軍營○僧格林沁等奏二
月二十八日子刻該逆潛行出巢向西南奔撲因我兵防守嚴密
不能免脫詎料該逆暗施詭謀在賊巢內向西南礮臺邊開挖地
道於二十九日夜間將礮臺前濠牆轟塌卽由此處衝出昏夜倉

卒兵勇一時潰亂幸礮臺以外尚有圍濠臣聞警馳至調集兵勇截剿始將該逆擊退仍潛入溝內依前死拒伏思此股逆匪人數無多臣握帶重兵不能迅速蔽功已屬有負倚畀今有此挫失尤屬調度無方應請旨將臣僧格林沁交部議處至挑挖引河業已開工其引河兩旁遇有低窪處先行培土築埝以免旁洩浸沒民田計期十日內外即可竣工上諭軍機大臣等馮官屯賊匪狡悍異常雖人數無多尙思竄逸若不實力進攻遷延時日該逆轉得乘我之懈肆其猖獗何日始能蕆事僧格林沁前奏馮官屯屋宇均經轟塌該逆僅恃空窖潛藏以避礮火豈尙容其久延殘喘著僧格林沁等督飭兵勇一面奮力圍攻一面嚴密防範斷不准任其竄出再致滋擾另片奏遵旨挑選馬步官兵四千名派副都統常亮等統帶赴豫等語見在河南南陽信陽等處在在喫緊此

項馬步官兵一俟行抵豫省尙應速籌進剿著僧格林沁等飛催該副都統等星夜統帶前進毋許稍有逗留致滋貽誤將此由六百里加緊諭知僧格林沁並諭令德勒克色楞西凌阿崇恩知之○諭楊需奏餉需緊急請飭四川山西陝西迅卽撥解等語湖北賊氛復熾武昌失守漢川應城天門等處均被滋擾辦萬分喫緊楊需營中之餉早已不敷據稱川陝報解餉數僅銀四萬五千兩爲數既少計日尙遲若使接濟不及兵勇枵腹荷戈殊爲可慮著樂斌王慶雲截齡無論何款迅速籌撥解赴楊需大營以應急需楊需兵勇屢經挫失前飭樂斌撥兵勇各一千名派顏朝斌陳有才管帶赴楚卽著飛催前進此外有無可撥官兵並著悉心籌畫添派前往以助攻剿至陝西前次撥解楚省大錢見在該省未能一律通行無以濟軍營之急此次撥調湖北軍餉毋庸搭解大

錢軍務緊要該督撫等接奉此旨迅速遵辦毋稍遷延將此由六百里各諭令知之○諭官文楊需奏此次武昌失陷雖因兵力饑疲奸匪內應究因漢川進攻之兵不能得力以致省城孤立無援見在胡林翼等兵勇尙在金口南岸李孟羣等師船尙紮京山或不難攻復武昌斷賊南竄湖南之路而楊昌泗劉富成之兵遇賊卽退萬分怯懦雖楊需續派兵勇前往爲數僅止二千若再有挫失則德安迤北可以徑達信陽德安迤西又爲徑趨襄陽之路逆勢蔓延豈堪復問官文所請酌派湖南官兵已諭駱秉章酌辦能否抽撥尙難豫計卽使稍有接濟亦於北岸防剿無裨前諭價格林沁籌撥之兵本日據奏已挑選馬隊一千五百名步隊二千五百名卽日啟程業經諭令英桂徑行催赴荆襄一帶楊需務當妥爲調遣或力扼襄陽或進攻德安總以迅速剿辦爲要不得再有

疏失儻荆襄稍有蹉跌或該逆聲東擊西乘我兵力全注襄陽又從德安竄撲豫境朕必將楊需從重治罪決不能再邀寬典也前調四川兵勇各一千名本日復經降旨飭催此項兵勇先從荊州經過官文本轄兵勇如尙敷布置不可率行截畱俟續有川兵到時再行分撥會剿此時楚省賊勢南北蔓延幾至無從著手官文等分辦合辦同係一事大江以北朕統責之楊需荊州防守事宜卽責成官文布置南岸攻剿事宜卽責成胡林翼妥辦其如何互相援應迅速肅清之處該將軍等務當熟計兼權亦不能自分畛域也將此由六百里加緊各諭令知之○諭據楊需奏胡林翼王國才石清吉等兵勇約計雖有六七千人惟糧餉缺乏川陝各餉尙未解到若湖南就近可以接濟金口尙能駐紮則相機進剿若不能駐紮則設法渡江上扼漢川等處以固荆襄門戶等語著駁

秉章悉心籌畫湖南兵勇儻有可籌撥卽當派委得力將弁管帶
赴下游速爲援應所需糧餉就近設法接濟如或該省兵勇不敷
抽撥而胡林翼等兵勇又復上扼漢川則金口一帶勢難兼顧恐
逆匪乘虛上駛該省與湖北毗連在在可慮尤宜於南北交界處
所水陸要隘加意嚴防毋得稍有疏懈將此由六百里加緊諭令
知之○以胡林翼署湖北巡撫文俊爲湖北布政使李孟羣署湖
北按察使由廣西平樂府知府署○予湖北殉難巡撫陶恩培祭葬世職諡
文節署武昌府知府多山遊擊陶得壽祭葬世職○免經過地方
額賦十分之三○丙寅諭內閣勞崇光惠慶奏勦辦龍州匪徒將
戕官首要各犯殲擒殆盡一摺上年六月間遊匪陸成泰等在太
平府屬龍州廳地方滋擾拒捕戕官復敢糾約匪黨疊次抗拒經
甯明州知州劉作肅土思州黃政業等率同兵練分投痛勦將匪

首陸成泰等及狀官各犯悉數殲擒並將夥匪殲除殆盡辦理尙屬妥協在事出力文武兵練著該撫等酌量保奏毋許冒濫其在逃零匪仍著嚴飭地方文武實力搜拏務期淨絕根株毋畱餘孽

○諭勞崇光惠慶奏梧州艇匪被剿竄遁並藤縣被擾旋經克復一摺廣西艇匪梁培友等攻撲梧州府城自上年閏七月初五日至八月十二等日疊經署梧州府知府陳瑞芝等督兵殲斃多名該匪退泊三角觔分遣匪黨竄赴藤縣知縣瞿登莪等登陴守禦因軍寡不敵被匪闖入二十四日藤縣匪徒馮六並廣東另股匪徒關亞巨等先後到梧分水陸五路進撲郡城陳瑞芝等督帶兵勇分投截剿該匪等仍退泊三角觔二十八日按察使張敬修帶兵抵梧於三角觔一帶沿岸剿擊先後斃匪四百餘名擊沈賊船二十餘隻九月初四至十月初八等日該匪疊由長洲白馬廟黃

垣頭趨水關等處登岸向城攻撲張敬修等內外夾擊奪獲賊船四十六隻隨用大船裝載沙石將三角觜江面填塞賊勢日蹙猶於十二等日悉眾來撲十六日夜官軍乘風縱火燒斃匪徒不計其數餘匪東竄兵勇跟蹤追擊竄匪於匯龍江口等處屯踞與藤縣城內匪徒互爲援應經水陸兵勇會合剿捕生擒匪首莫木二圭公潘張斯文養歐亞洗葉大骨志等五名當將縣城收復零匪翻山奔竄此股艇匪黨多勢悍見經官軍剿除殆盡仍著勞崇光等飭屬將首匪梁培友等嚴密按拏並將敗竄餘匪悉數殲擒毋任一名漏網在事出力員弁並著勞崇光等擇尤保奏毋許冒濫○予廣西被戕州同廣壽等祭葬世職○丁卯諭內閣葉名琛柏貴奏克復佛山一摺廣東匪徒自上年六月占據佛山鎮恣意橫行經葉名琛派委員弁紳士水陸攻剿大小二十餘戰省城股匪

屢被創懲肇羅道沈棟輝於十一月初三日偵知該匪有放火延燒街市情事卽飛稟該督撫添調兵勇戰船督帶進剿該道馳抵佛山逆匪築臺列礮釘樁激水抵死抗拒復於文昌鷹觜兩沙屯聚多賊以爲犄角初六初七日官軍陸路連獲大勝將賊營次第踏平初八至初十等日官軍水陸進攻復沈毀賊船無數嗣後軍威愈振沈棟輝隨卽四面分布官軍同時進剿所向披靡統計一月內擊殺賊匪一萬九千七百餘名斬獲首級三千三十餘顆生擒五百十七名其焚溺轟斃捆解遣散者不計其數佛山全鎮一律肅清沈棟輝應變知機督剿卅月卽將負嵎巨匪全股蕩平實堪嘉尚著葉名琛等卽行據實保奏候朕施恩其餘員弁紳士同心協力無戰不捷亦屬著有微勞著一併查明分別酌保無遺無濫仍著該地方文武將剿殘餘匪一體認真搜緝以期淨絕根株

○賞看守各行宮弁兵半月錢糧○予廣東殉難道員任爲琦等

祭葬世職○戊辰 上謁 泰陵 泰東陵 昌陵 昌西陵

慕陵是日回鑾○辛未 上奉 皇貴太妃還宮○壬申諭內閣

吳振械蔣霽遠等奏兜勦竄逃賊匪殲斃黔西首逆一摺此股賊徒經官兵疊加勦洗猶敢糾集餘黨合力死拒我軍追捕奮力殲擒並將逆首王三札巴殲斃辦理尙爲得手惟首逆楊瀾仍未就獲該撫等務當督飭兵練搜捕務獲無任漏網並將竄逃餘匪一律搜除淨盡以絕根株所有在事出力文武員弁人等著擇尤保奏候朕施恩○諭軍機大臣等見在逆匪意圖上竄湖北荆襄一帶情形緊要官文駐紮荊州兵力未免單弱楊需一軍又屢經挫失自武昌復陷胡林翼李孟羣等所帶水陸兵勇亦不免勢孤殊爲可慮黃宗漢前奏由河南陝西赴川計此時將次抵任著偵探

荊州一帶情形如賊蹤尙未埽除卽與樂斌商酌督帶兵勇馳赴夔巫一帶相機進剿其四川總督事務仍著樂斌署理如探知楊需各軍剿辦得手逆匪不至上竄該督卽可無庸前往仍飭前調兵勇迅速赴楚毋稍延誤樂斌黃宗漢務當斟酌緩急妥籌辦理不得稍分畛域將此由六百里各諭令知之○癸酉諭內閣何桂清奏請將廢弛防務之員革職等語安徽甯池太廣道兼署徽州府印務恩禧於徽州軍務既不實心辦理復扣畱捐項積欠勇糧以致兵勇不能用命實屬貽誤地方殊堪痛恨恩禧著先行革職仍著何桂清查明該員下落據實具奏○何桂清奏逆賊裹脅各路土匪分踞徽州歙縣黟縣休甯四城一聞大兵雲集卽有蒼黃西竄之意石景芬在霞井軍營先密派勇目許庭桂等潛入郡城探知賊情擬於二十三日潛師夜遁飛報回營石景芬卽由霞井

移營進紮大阜派令勇首夏寶慶等管帶槍勇爲第一隊直抵東門又令勇首李恆淞等管帶台勇爲第二隊由護嘉興協副將魁齡督帶直抵北門其第三隊由石景芬親督直抵南門從紫陽橋一帶連環施放槍礮長驅直入勢如破竹該逆聞風喪膽馬隊飛竄西門我軍步追十餘里生擒自二十餘名土匪數十人一併軍前正法其餘轟斃殺死者不計其數該逆由屯溪一路竄往休甯是夜不及窮追收隊入城查勘郡邑兩城各衙署尙存石景芬卽將各勇分派各城門紮營嚴守臣查此次進剿徽州逆匪浙江將士勇於用命旬日間克復郡邑兩城實爲至幸鄧紹良統帶兵勇指日抵徽卽會合攻克黟休二城以冀早紓宸廑至金華府知府石景芬於大兵未集以前深入賊巢功成一夕實屬奮勇有爲徽郡善後事宜臣卽責成該員一手經理合無仰懇天恩先

予超擢以作士氣 上諭逆匪攻陷徽郡並將歙縣城池占踞經
何桂清派知府石景芬督飭勇目夏寶慶李恆淞並副將魁齡等
帶領槍勇台勇分隊攻打東南北三門逆眾聞風喪膽逃竄西門
我軍追殺十餘里生擒賊目二十餘名土匪數十人均卽正法其
轟斃殺死者不計其數立將徽州歙縣收復見在向榮所派鄧紹
良各軍將次雲集著何桂清飭鄧紹良督率乘勝進剿克復休甯
黟縣二城以清徽境石景芬著記名以道員用並賞加鹽運使銜
以示鼓勵○諭軍機大臣等何桂清奏克復徽州歙縣兩城並添
兵勇進攻黟休二城各摺片見在賊眾蟻聚休黟二城必須乘此
聲威迅圖克復此時鄧紹良統帶兵勇諒已馳抵徽郡所有各路
帶兵官弁均歸鄧紹良調遣以專責成該撫卽督飭該員卽日進
剿休黟賊黨並酌畱兵勇防守徽歙毋令乘虛回竄再致蔓延其

徽浙各路軍務及一切支應事宜卽飭臬司晏端書實力督辦勿稍貽誤將此由六百里加緊諭令知之○甲戌諭軍機大臣等托明阿等奏籌防浦口兼顧北岸上下游全局一摺金陵逆首既有欲由浦口北竄並詐襲各岸營盤及裝載柴火圖燒師船之意則自揚城以西儀徵六合浦口至江浦等處皆須節節嚴防而瓜州鎮賊匪欲撲揚州三汊河樸樹灣一帶蓄謀亦非一日此時薩炳阿管帶之馬步官兵見已抵揚泊承陞所統挖呂戰船已至焦山吉爾杭阿亦督率上海得勝兵勇攻勦鎮賊自應南北進兵水陸並舉以陸路分攻瓜鎮以水軍攻取金山使該逆三路不能兼顧方爲上策浦口緊對金陵本爲賊蹤往來之地江浦後路復可暗襲浦口武慶等兵力甚單托明阿所稱抽撥精兵僅止四百餘名是否足資堵禦江北屏障之區布置不容罅漏仍須責令武慶溫

紹原等實力扼守其浦口以上梁山以下烏江一路本有恩錫張光第在彼駐紮亦可與該司道聯絡聲勢稍免後顧之虞惟橫江賊鍊賊獐日久未斷終恐衝突爲患托明阿等與向榮雖各統各軍實同辦一事著卽公同嚴督上下水師設法會剿先毀賊鍊遇有兩岸接仗迅速駛赴江岸協擊以牽賊勢向榮前奏李德麟吳全美等紅單局艇各船俱有損傷刻下當已修整卽應趕緊進剿不得以鼓風欠靈日事延閣其五龍山江面雖設有闌鍊木檔而江漲日寬風濤撞激究未可恃至瓜州賊匪匿巢不出卽築就長圍不過杜其出擾總宜亟籌戰取以覆賊巢吉爾杭阿早至鎮江亦著飭令余萬清等剋期攻克毋再遷延俾上下游南北岸漸就殲除方無他慮將此由六百里加緊各諭令知之○諭曾國藩塔齊布奏軍餉不支請飭閩浙二省籌銀接濟等語見在曾國藩等

駐兵江西省城因湖北武漢一帶爲賊占踞糧道已斷四川湖南之餉不能運解前往其水路各軍兵勇口食僅恃江西一省捐項不敷支放必須鄰省通融接濟方足以資攻剿著王懿德何桂清於該省無論何款項下籌銀二萬兩派委妥員解赴曾國藩等軍營應用該督等務迅速籌解毋誤要需將此由六百里各諭令知之○曾國藩塔齊布奏臣等就湖北安徽江西三省全局論之陸路須有勁兵四支水路須有勁兵兩支乃足以資剿辦北岸自蕪水廣濟黃梅以達太湖宿松是爲內一路自漢口黃州蘄州田鎮武穴濱江而下以至小池口望江縣是爲外一路南岸自九江以上興國通山崇陽武甯等屬皆土匪勾結粵賊之淵藪是爲西一路自湖口以下東流建德饒池徽甯四府皆逆匪覬覦浙江之要途是爲東一路北岸之黃梅太湖前臨大江後枕潯岳一山屏

敵舒廬爲該逆必爭之地南岸池州雖係瘠區而大通鎮殷家匯水陸交衝南窺徽嚴東障蕪湖亦爲該逆必爭之地故南岸以東一路爲最要而西路次之北岸以內一路爲最要而濱江一路次之四路者須陸兵四支缺一不可者也水師自武昌以達湖口爲上一支自小孤山逾東西梁山以達太平采石爲下一支乃與紅單船相接兩支各自成軍分段肅清庶免首尾不顧腹背受敵之患亦缺一不可者也今臣等水軍陷入鄱湖之船百餘號回救鄂省之船百餘號業已分爲上下兩支似有因禍得福之機然內湖一軍臣國藩來江整理造船添勇無難就緒回鄂一軍以被風擊壞之船當將士疲勞之後與漢口新竄之賊相持臣等又不能分身前往統領日夜懸念每聞春風怒號則寸心欲碎見賊帆上駛則繞屋徬徨不知李孟羣等果能添置小船復振軍威否臣等止

此一軍欲分爲兩支則立形單弱欲常聚一處而事勢所迫有不得不分者又不敢過於持重致失機宜謹就目前之急務度臣等力所能辦者分條布置爲我皇上陳之一見在賊竄饒州樂平分擾景德鎮祁門徽州等處所謂東路者也爲江浙轉餉之路亦爲奏報入京之路關繫大局非輕臣等分派羅澤南帶湘勇三千由江西省城繞至湖東攻剿饒州之賊又與撫臣陳啟邁合募平江勇四千同剿東路俟饒郡克復卽引兵直下或趨景德鎮或由建德進攻池州北路有重兵使安慶之賊震動則浙江之患可以少紓臣等前摺所謂賊攻我之所必救我亦攻賊之所必救也一悍賊石達開等堅守九江及對岸之小池口臣塔齊布一軍仍畱五千人穩駐潯郡伺隙攻城使賊不敢全數上竄武漢亦不敢奔突他處惟前此攻圍潯城至萬五千人之多兩次派胡林翼王國

才回援鄂省者六千餘人此次派羅澤南馳勦饒州者又三千人在潯官軍過形單薄俟籌添兵勇續行具奏一正月二十八日臣曾國藩派水師船六十餘號至康山地方駐紮外防大江之賊駛船入湖內防饒州之賊擄船出湖其餘弁勇尙在江省修船日內修完大隊進紮南康青山一帶其湖口賊卡浮橋既堅鋪以木板填以土石人力難以遽破俟春江漲盛水陸併攻卽當力破浮橋衝出大江一臣曾國藩來江已逾月餘日內船隻修齊卽駐紮鄱陽湖內四處游弋西近塔齊布九江一軍聲息常通東近羅澤南饒州一軍調度亦便兩軍相隔已在六百里外全賴水師在湖中接遞信息庶可彼此相應如東路攻勦得手能至彭澤東流等處將來水師出江乃得所依護而無孤懸之患以上四條就目前之急務臣等力所能行者籌商辦理是否有當伏乞 皇上訓示施

行又奏論中原之大勢則江北重於江南論此賊力爭長江堅守廬州之情亦必須梅太舒桐一帶有支堅強可恃之兵然後內可以克廬郡外可以清江面此時江北縱不能籌備兩軍亦可以不添置一軍伏查鳳陽之臨淮關由壽州光固以達於麻城黃州程途不過八百餘里副都御史袁甲三在臨淮駐紮年餘與壽州相隔咫尺光固亦其桑梓之地若令該副都御史招募二處之勇練成五千勁旅由麻城出黃州之背不過十餘日可到人地既熟道途無梗出其不意邀而擊之則蕲黃各屬可復皖鄂兩省之氣可通相應請旨飭下袁甲三招募壽州光固之勇由麻城迅出黃州以全江北大局又奏一等一軍曾經奏請江西湖南四川三省勸捐助餉今賊匪占踞漢口原軍遠隔下游糧道已斷四川湖南之餉不能運解來營卽去歲奏准陝西協餉下欠十二萬兩亦不

能解到僅恃江西一省捐項

臣

等水陸萬餘人殊不足以資接濟

相應請旨飭下江西撫

臣

陳啟邁在於四年漕折項下每月酌撥

銀兩准川陝之款即可撥歸江北一軍應用惟上游西通川陝北

通河南來源尚廣

臣

軍僅取給於江西來源太隘勢難久支不揣

冒昧請旨飭下福建督

臣

王懿德浙江撫

臣

何桂清每月各籌銀

二萬兩解赴

臣

軍俾兵勇口食不匱免生他虞

上諭據奏楚皖

江西三省全局陸路須分兵四支水路須分兵兩支於剿辦機宜

頗爲明晰惟據楊需等奏武漢復遭蹂躪賊勢益張該侍郎等水

陸兩軍已成孤立之勢見在賊竄饒州樂平分擾景德等處羅澤

南已帶勇進剿著卽飭該員趕緊克復郡城以次掃除昨據何桂

清奏賊破徽州已經收復見擾休黟等處羅澤南如剿除饒州府

賊匪卽可相機前進攻剿池州安慶之賊塔齊布圍攻九江亦未

便撤動仍當添募兵勇奮力攻擊以牽制逆匪使不得肆行奔突
曾國藩師船並江西所造戰船尤須設法將湖口賊卡浮橋併力
攻毀駛出大江與塔齊布在九江會合以圖克復袁甲三見已革
職飭令來京臨淮兵勇本不甚多既不能撥赴麻城黃州若募勇
訓練尙恐緩不濟急本日已諭令和春等酌量辦理其能否添撥
進剿之處尙未可定總俟山東軍務告竣不但兵力可分並可派
員前往於江北一帶妥爲布置至曾國藩等所需餉銀已諭閩浙
兩省照數籌解但恐尙須時日著陳啟邁於四年漕折項下每月
酌撥銀兩以濟要需四川湖南等處餉銀仍當設法催提俾資接
濟將此由六百里加緊各諭令知之○諭前因袁甲三交部嚴議
飭令來京其所帶兵勇當諭令和春等酌委得力大員前往尙未
奏報殊深懸繫臨淮控制全淮爲南北兩路要衝防守機宜斷不

可稍涉大意本日據托明阿等奏浦口六合等處拏獲奸細有金陵逆首擬由水陸攻襲浦口大股北竄等供托明阿等攻剿瓜州賊匪正當喫緊勢難多撥兵勇赴浦口防禦武慶等兵力甚單設有疏虞關係甚鉅浦口與皖省接壤其烏江一帶前官軍屢次攻毀賊壘卽著嚴飭廬鳳道張光第等實力防禦與武慶等浦口之師聲勢聯絡以杜賊匪北伺之意參將劉玉豹駐紮全椒縣屬之官渡亦可就近策應毋任稍有疏懈又據曾國藩等奏稱臨淮關由壽州光固以達麻城程途甚邇若令袁甲三由臨淮招募壽光二處練勇五千由麻城出黃州之背併力邀擊則蕪黃可復皖鄂兩省便可聲息相通等語該侍郎所籌自因江北一帶並無得力勁旅故擬添此一軍以資進剿惟臨淮防務亦甚緊要此時能否分兵前進著和春等酌度情形妥籌辦理廬州賊匪旣已窮蹙官

軍長圍已合何以日久尙未得手總須早復廬郡大兵便足敷分撥務卽迅圖克復毋再遲延將此由六百里加緊諭令知之○乙亥諭軍機大臣等和春福濟奏請飭怡良撥兵勇一二千名交張芾統帶赴徽甯一路督辦防剿等語張芾係發往軍營差委之員該提督等請明降諭旨令其馳赴徽甯調度各軍於事恐爲無益見在鄧紹良已行過浙境各路赴徽援剿兵勇均歸調遣昨復諭知何桂清督飭該員迅圖剿辦若再另派統率之人轉致事權不一張芾著仍遵前旨交和春等差遣委用是否令其卽赴徽甯隨同攻剿並著何桂清酌量辦理至上海凱撤之師本係勇多兵少見已分赴金陵鎮江怡良駐紮常州帶兵亦屬無多徽郡兵勇經向榮何桂清派往者已有數千毋庸怡良等再事籌撥至廬州軍營卽使差委乏人亦何至專保廢員始收指臂之助福濟所請令

黃恩彤赴廬州差委之處著不准行將此由六百里加緊各諭令知之○和春福濟奏奉 上諭酌委得力大員接替袁甲三查見辦團練侍衛多慧幹練老成機宜熟悉已飭該員剋日前往臨淮接替所有袁甲三原帶文武將弁悉歸節制以一事權報聞○丙子諭內閣怡良奏查明鹽船積弊並土匪私設鹽卡擾害票法二摺准北綱鹽行銷皖豫二省日形壅滯據怡良查明因各商販運經由阜陽霍邱固始三縣交界處所有船戶等肆行舞弊致虧客本又信陽羅山二處爲行銷最暢之區光山係必由之路聞該境私設鹽卡盤踞需索以致往來客販畏葸不前自應亟加整頓以肅鹺政著英桂福濟嚴飭各該地方官凡淮鹽經過處所如船戶人等有敢行盜賣並水手攪和沙土等弊一經查出卽行拏究毋得稍分畛域至土匪私設鹽卡尤屬大干法紀並著該撫等密速

查拏從重懲辦斷不准稍涉疏縱以除積弊而裕國課○諭軍機大臣等前此僧格林沁故撤高唐南面之兵原爲誘賊離巢追殺易於得手乃自竄馮官屯以後又已月餘該逆匪抵死堅匿而官軍竟無計可破前月二十九日之賊甚至傷亡兵勇遺失礮位似此情形轉不如任其坐困高唐猶得以糧盡制其死命該大臣所用水攻之法見已竣工惟聞該屯地勢微高逆匪在濠內添土築壘巧爲抵禦是水勢雖形暢旺不過灌滿四面濠溝而止該逆在屯內仍能暗施詭計卽見在掘濠厚灌自下而上亦難得力如果此舉再無成效該大臣又計將安出以萬餘兵勇圍數百之賊百計經營迄無把握朕心實深焦灼著僧格林沁卽將見在水勢若何攻剿能否得手及水攻儻不可恃應作何設法之處迅速具奏總期剋日蕝事以慰懸望至撥赴河南之馬步隊官兵四千名業

經降旨令赴湖北迎剿河南兵力空虛防堵倍形喫緊前此諭知該大臣等如東省官兵可期得力卽酌量歸併大營嗣據覆奏大營兵勇足敷圍剿是山東官兵見尙可以抽調著僧格林沁會同崇恩卽行選派三四千名派委得力將弁管帶前往河南交英桂調遣專備該省防堵之用仍咨明英桂沿途妥速迎提毋任稽留延緩將此由六百里諭知僧格林沁並諭德勒克色楞西凌阿崇恩知之○諭前因襄樊緊急曾諭令扎拉芬帶兵迅赴湖北與楊需等會同攻剿本日據載齡奏請飭扎拉芬駐紮棗陽扼守由楚入陝要隘等語該將軍帶兵赴楚原爲探明賊蹤以剿爲防見在該逆上竄尙無定向若令扎拉芬專駐棗陽轉成株守務須確探賊蹤若棗陽緊急卽會同楊需實力截剿儻該逆紛竄他處卽當帶兵迅出賊前迎頭截擊切勿止顧一隅致誤事機將此由六百

里加緊諭令知之○以基溥爲左副都御史

由太僕寺卿遷

○辛巳諭內

閣托明阿等奏浦口各營獲勝焦山水師攻獲賊簿並向榮奏師船斬鍊攻出上游各一摺三月初七日已革總兵王鵬年會同吳全美李德麟督率各船分南北岸進至七里洲沙觥攻該逆礮臺礮隄吳全美由南岸鈔到轟沈賊船二十餘隻時九洲洲亦出賊船七八十隻李德麟自北岸兜截斃賊無數武慶亦督帶陸路官兵由三板棹直擣九洲洲賊船王鵬年復將護鍊賊船擊溺多隻葉常春周希濂分領浦口局艇從兩岸前來會合各勇由七里洲九洲洲夾攻接應紅單挖罟各船全幫駛出上游將賊船擊沈焚毀自辰至申鏖戰五時斬鍊兩道焚擊賊船三百數十隻斃賊無數焦山水師總兵周士法等亦同日進攻金山賊營時江面賊簿隱動北固山賊隄亦從內開礮我軍一面迎擊賊隄一面泝流上

攻賊竄賊勢不支落水淹斃者無算著托明阿向榮等督飭各營水陸會剿克復瓜州鎮江並著將江面上下游賊船一律剿除此次出力員弁兵勇等准托明阿向榮擇尤保奏以示鼓勵○諭何桂清奏克復休甯縣城一摺徽州賊匪自我軍克復郡城後竄往休甯二月二十四日石景芬飭令勇目夏寶慶等帶隊進逼休城署休甯縣知縣唐寶昌密約紳士吳益文等帶領練勇同時進剿於初更時一擁入城賊匪驚竄殺斃甚多縣丞張奇炳署徽州左營守備汪連陞先後趕至隨同追擊三十餘里即將縣城克復著何桂清卽行督飭石景芬等迅速進剿肅清徽境毋稍遲延在事出力紳勇著何桂清覈實酌保候朕施恩○僧格林沁等奏本月初四日引河工竣初五日將圍濠灌滿隨復向北浸淹惟馮官屯地勢微高見雖將水浸入賊濠二道深已三四尺不等濠外低窪

處所亦有一二尺尙未能浸灌逆匪地窖臣等展轉思維若啟隄水勢過大恐引河內漫溢有礙民田若先將引河兩岸培厚加高又恐工程浩大不敢輕舉惟有趕造水車用人力掣灌方爲萬全見已趕緊製造以資應用且該逆詭謀惟恃挖掘地雷前於放水次日見西北溝內漂出藥袋藥簍甚多自係該逆暗放地雷之所此時地已溼透斷難施此伎倆至前次撥赴豫省馬步隊官兵業於初二日分起前進初八日全數啟程又奉到諭旨著會同崇恩選派山東官兵三四千名赴豫查見在東省兵力單薄惟豫省防堵尤關緊要臣與崇恩悉心籌度見擬選派官兵一千名東勇一千名卽日馳赴河南聽候調遣上諭軍機大臣等本日據英桂奏前派馬隊一千五百名於荊襄一帶地勢不甚相宜請截留改撥等語此項官兵已據僧格林沁奏派副都統常亮等帶赴信陽

防次業經啟程即可毋庸折回改撥其續調山東兵勇共二千名務卽挑選精壯步隊飛催前進毋稍遲誤馮官屯賊匪爲數無多我兵圍剿月餘尙未殄滅實深焦灼本日據奏水攻之法尙須趕造水車用人力掣灌不免又稽時日總須著力攻剿勿徒恃水攻方爲妥善將此由六百里加緊諭知僧格林沁並諭德勒克色楞西凌阿崇恩知之○諭英桂奏馳抵信陽添兵扼守關隘以資攻剿本日據僧格林沁奏選派兵勇共二千名前往河南交英桂調遣以防賊匪北竄俟此項官兵抵豫後或可與常亮所帶馬隊官兵互相調換以期得力見在賊踞德安南汝光商均屬接壤英桂已抵信陽卽可就近調度邱聯恩見赴三關防堵著飭令該總兵加意嚴防以固邊圉泥台敗竄捻匪雖經擒斬多名並須嚴飭該道府等淨絕根株勿令餘孽復萌致滋後患楚北軍情並著英桂

隨時確探迅速具奏將此由六百里加緊諭令知之○諭托明阿等奏浦口水陸各營大獲勝仗一摺並據向榮奏師船斬鍊攻出上游亟籌調兵由陸路接應並請調馬隊助剿各摺片紅單各船自駛入大江總未能痛剿賊踪此次水陸進攻斬斷鍊兩道焚毀賊船三百餘隻水師初次得力正可趁此聲勢南北約會各攻瓜鎮兩城並嚴飭水師將弁剿除金山賊營以孤賊勢逆匪分踞瓜州鎮江全恃江面賊船往來接應此時賊船既攻出上游卽當節節進扼使南北兩岸之賊不能互相勾結則剿辦自易爲力據向榮奏稱兩梁山尙有賊設關鍊礮船林立蕪湖太平逆黨尙多必須亟籌陸路一軍沿江接應自係實在情形著卽設法布置該逆見欲窺伺黃池甯國鄧紹良卽可進攻蕪湖以圖與舟師會合剿除梁山賊匪該逆經此次懲創尙恐另生詭計以牽掣我軍托明

阿向榮仍當督飭水陸各軍一面進剿一面嚴密設防杜其奔竄
向榮調吉林馬隊一千名來江助剿如金陵大營需兵緊急可先
於托明阿所帶馬隊官兵內商酌數百名渡江協剿該大臣等雖
分剿南北兩岸之賊實則共辦一事務當統籌全局以期迅掃賊
氛將此由六百里加緊各諭令知之○英桂奏臣聞亳州擒匪滋
擾當飭張維翰於皖豫交界扼要處所會督台辦據該道稟二月
二十三日帶兵抵亳與陸希湜分路兜剿會同參將全喜等由渾
河集至泥臺店二十四日黎明該匪蠡擁而至各營槍礮環施斃
賊百數十名餘匪四散竄匿二十五日泥臺敗竄之賊適遇於麻
種集擒斬尤多該道卽由耿黃寺觀音堂至劉家集一路追捕又
獲擒匪十七名復經夏邑鹿邑等縣地方官先後拏獲潰竄擒匪
三十九名惟首犯尙未弋獲仍飭該道等嚴密搜拏以清萌孽報

聞○予安徽殉難知縣廉驥元等祭葬世職○癸未諭內閣惠親王恭親王奕訢奏錢法亟宜整頓酌擬章程五條呈覽一摺戶工兩局並鐵錢局鼓鑄當十大錢凡官收民用均應恪遵功令一律行使近以私錢過多人懷疑畏銀市奸商並敢將大錢與制錢各定價值任意軒輊兵餉民食攸關自應亟籌整頓著照惠親王等所請嗣後順天直隸山東山西等省徵收地丁錢糧凡零星小戶及銀鈔尾零完納錢文者俱准呈交銅鐵當十大錢並鉛鐵制錢如官吏書差勒索挑剔不肯收納准該民人控告究辦其餘較遠省分以次遞推遵照辦理其民間買賣交易儻敢聽信奸商把持任意阻撓初犯者枷號示眾再犯者發極邊煙瘴充軍遇赦不赦其有故意刁難致大錢買物之價昂於制錢者亦卽照阻撓律治罪至私鑄錢文本干例禁尤宜嚴加懲治嗣後凡私鑄大錢人犯

拏獲到官除將該犯按新定律例訊置重典外仍將該犯家產入官並准軍民人等首告誣告者仍反坐所有一切詳細章程卽照所擬著巡防王大臣步軍統領順天府五城出示曉諭並著近京各直省督撫等一體遵行務期家喻戶曉藉導壅滯至錢文之鼓鑄間有未善則民間不知寶貴並著戶工兩部錢法堂侍郎督率該監督等將兩局當十大錢加工鼓鑄務使分兩均齊制作精良以重圓法而裕國用○諭軍機大臣等惠親王恭親王奕訢奏請飭催鐵斤等語前經惠親王等會同戶部奏准令山西省每歲採辦生鐵一千二百萬斤解京交局先將一半生鐵六百萬斤於三月內埽數解到以濟鼓鑄本日據王慶雲奏僅起解片鐵一百萬斤見在局中存鐵無多若多延時日必致有悞要需著王慶雲督率藩司飭令該委員妥速籌辦除見解一百萬斤外再將生鐵五

百萬斤星速解京其餘一半並著及早採買源源續解至鐵價每斤三十文既經招商承辦以後不得再議加增以歸覈實其鐵斤起解日期卽著咨報鐵錢局查覈毋得稍有遲誤將此諭令知之○惠親王恭親王奕訢等面奉諭旨惇親王奕誼著降爲貝勒革去一切差使加恩仍著戴用紅絨結頂服用金黃蟒袍在內廷行走上書房讀書○河南巡撫英桂奏德安賊匪東竄見飭弁兵出關堵剿得旨覽奏曷勝焦急以後情形迅速馳奏汝能隨時相機調遣勿稍拘泥方安○予陣亡遊擊明恆祭葬世職○甲申諭內閣步軍統領衙門奏軍營撤回官兵攜帶幼孩查辦情形一摺軍營凱撤官兵沿途攜帶良民子女本有治罪專條此次該衙門查出官兵所帶幼孩均係被脅難民投營後隨從來京與沿途攜帶良民子女者不同既據該官兵交出自應妥爲安置惟此項幼孩

或故鄉被擾或親屬無存若概行遞回原籍恐其中無家可歸者轉致流離失所著在京各旗營衙門一體查明除見在交出三名外凡有攜回幼孩均飭該官兵等按名呈出如有親屬可投及力能自還本籍者著卽准其回籍毋庸官爲遞送不願回籍者准其在京自謀生理○恭親王奕訢面奉諭旨貝勒奕訢著仍服四團龍補服內廷王公班次著在載銳之次王公班次著在奕綱之前○乙酉諭內閣多羅貝勒奕訢第一子著命名載濂○諭多羅貝勒載中著改名載治○諭軍機大臣等御史宗稷辰奏大江南北設卡抽釐收捐太雜出入總數毫無稽覈並有常鎮散勇與江南土豪在江邊距圖山關相近地方樹幟攔船肆行盤踞與營卡比列莫辨公私請將釐捐事宜責成江督經理等語江南省捐釐濟餉雷以誠勘議於前文煜接辦於後原期集餉安民兩無窒礙其

揚通一帶設立各卡均有章程可稽豈容任意添設若如所奏官
 收捐項已極繁瑣復有匪徒冒名勒索擾累行旅更屬大干法紀
 著托明阿等確切訪查如有奸徒把持漁利卽著從嚴拏究以靖
 地方至該御史所奏百里之間設卡過多應行歸併刪減之處著
 酌量情形奏明辦理其所請責成江督稽覈及簡員管理事多窒
 礙著毋庸議至官軍發項未能按期支給如果抽釐事務辦理得
 宜所捐款項悉歸實用於軍餉亦有裨益該大臣等務當悉心妥
 辦毋得援害閭閻徒使奸徒中飽而於軍餉仍無實濟原摺著鈔
 給閱看將此由四百里諭知托明阿向榮吉爾杭阿陳金綬雷以
 誠並傳諭文煜知之○丙戌諭軍機大臣等陳啟邁奏饒郡賊匪
 紛竄合力兜剿一摺竄擾饒州之賊意在窺伺廣信撫建等屬此
 次連竄樂平德興復掠撫民船攻撲石鎮街雖經立時剿退興安

一帶亦有官兵防守已由黃柏塘小路突入弋陽境內該邑爲浙江屏障又與江西省撫建二縣毗連賊勢紛竄腹地滋蔓堪虞況徽郡游匪雖據何桂清奏疊次收復徽歙休甯府縣三城餘黨尙聚夥縣浙省不免戒嚴若再令由廣信逸出與徽賊勾結不但阻梗驛路更恐掣動蘇杭羅澤南所帶湘勇並新募平江練勇馳往會同林福祥合剿著卽責令該道府等迅掃妖氛饒州尙有股匪亦著陳啟邁飭令都司吳錫光就近渡湖以次攻復都昌直抵饒郡與羅澤南分路夾擊使該逆首尾不能相顧勦辦方有把握若令其四處紛突更肆猖獗大局豈復可問該撫因徽浙防堵緊要將遊擊常海管帶浙兵六百名派往常山玉山一帶探明何處緊急卽由何處應援自應如此不分畛域曾國藩一軍所需軍餉已飭部速議仍著陳啟邁竭力設法接濟毋使匱乏將此由六百里

諭令知之○丁亥都察院奏據河南武生李景瑞等呈稱上年二月間逆匪蘇添幅等聚眾焚掠永城縣內並城西丈八集數十村屢經稟請勦捕前兩廣總督徐廣縉置若罔聞幸署太康縣知縣祝塏率商邱柘城鹿邑鄉團破賊於裴橋殺賊千餘蘇添幅逃入亳州四月該匪句亳捻王大柱等在蘇鹽店西賈莊肆搶五月又句亳捻數千竄永亳交界之耿黃寺均經祝塏集團擊退嗣祝塏因公西旋蘇添幅又句張落刑等萬餘人焚毀大王集等村鎮蔓延六十餘里徐廣縉始終不發一兵祝塏選帶壯勇數千進剿賊始大懼因造報讎之謠徐廣縉附和其說遂將祝塏調回賊勢從此益熾該匪紛竄天齊廟澮源集等處徐廣縉不得已始次會亭驛閏七月賊撲會亭驛徐廣縉聞賊來卽走軍裝盡失殺掠之慘更不忍言從此任難民日日哭訴總以不可結讎爲詞九月賊大

聚於亳境張家集閭家集廬廟商境黃冢界溝馬頭寺營郭等集
恣意殺掠又西擾柘城老王集等村十月間道員張維翰帶兵勦
辦鄉團協擒擒首多人十二月張落刑復糾眾數千人由亳州閭
家集至商境界溝集四出焚掠與夏邑劉隄團逆匪互相勾結皆
在包河北岸竭力拒守奈統領無人眾心不一等語伏乞 皇上
聖鑒 上諭軍機大臣等亳州逆匪蘇添幅在永城夏邑等處疊
次搶掠該處民不堪命徐廣縉以戴罪大員專司勦捕何竟置若
罔聞署太康縣祝壇督率商邱等縣鄉團勦辦得手何以遽令調
回此案前經學政張之萬奏參曾諭令該撫迅卽查奏迄今尚未
覆奏該撫接奉此旨著督同藩臬兩司將該武生等呈內所控各
節逐一嚴查如果徐廣縉畏葸避退以致閭閻慘遭荼毒卽著嚴
參治罪不得稍涉瞻徇其亳州歸德等處賊氛未靖著嚴飭張維

翰率同地方文武及防堵員弁迅速籌辦務將匪黨悉數殲除毋任貽誤地方原摺原呈均著鈔給閱看將此諭令知之○戊子諭軍機大臣等寄諭直隸總督桂良全慶文彩奏海運漕船被劫一摺據稱孫德茂等沙船裝載江浙漕糧米石並公項銀兩於二月二十五日行至山東黑水洋石島地方被艇匪搶劫銀米並有勒銀贖船情事已諭令山東江蘇各督撫嚴密防範並將疏防之登州鎮總兵田浩然摘頂示懲矣本年海運米船已到者未及十分之二隨後各船尚有數百餘隻並有隨帶公項銀兩爲數甚多著該督卽飭天津鎮道率同地方文武員弁於附近口岸加意巡防儻有奸徒潛迹乘間搶竊立卽嚴拏懲辦毋稍疏虞將此諭令知之○諭前據怡良等奏浙省及余山一帶洋面間有擄蓬盜船游駛派令總兵葉萬清統帶師船於海運米船開行時往來護送並

派副將侯攀鳳駕船先赴天津迎護進口兼飭參將黃登第等出洋巡緝以利漕行見在該船等經過東省既有被劫之事恐蘇省洋面匪徒難免聞風效尤海運漕糧關繫正供見在源源北上之時自應倍加慎重著怡良吉爾杭阿飭令葉萬清於江蘇浙江海運漕船開行時務須督飭兵船梭織往來妥速護送以期匪徒斂迹不敢窺伺至洋面盜船本不容聽其滋擾並著責成黃登第等親身出洋實力搜拏毋許稍有疏懈以免貽誤侯攀鳳係該督等派令隨同頭起米船赴津何以該船戶等失事之時並未見該副將督兵救護並著怡良等查明據實具奏將此由六百里諭令知之○諭前據崇恩奏報海運防衛事宜聲明內洋口岸責成登州府汪承鏞親歷各島稽查彈壓外洋巡哨責成登州鎮田浩然親督師船節節迎護是該總兵卽應剋日出洋探明來船妥爲防護

乃據全慶文彩奏江蘇運船孫德茂浙江運船盛寶安均於二月二十五日在石島以南洋面被匪搶去銀米貨物江蘇運船宋源昌張協隆二號先被搶劫復於二十九日被賊劫入島內勒銀贖船且有裝豆衛船數十餘隻同被擄困等語覽奏殊堪駭異石島爲榮城縣所屬地方商船往來必經之路卽無海運船隻亦應認真巡哨以安行旅況海運爲天庾正供甫入東境卽被搶掠並未見有該省師船爲之防護任令艇匪肆行無忌殊堪痛憾該總兵田浩然於所轄洋面漫無防範著先行摘去頂帶責令將洋面艇匪盡數搜剿不准稍事耽延儻此後續過海運漕船再有疏失朕必將該總兵從重治罪卽崇恩亦不能辭咎至石島池上煙臺俚島廟島等處均係海口要路並著崇恩嚴飭派出員弁實力搜捕其石島以南失事地方員弁並著查明參奏將此由六百里諭令

知之○吉爾杭阿奏

臣

於二月初一日自上海啟程行抵蘇州得

鎮江探報該逆分竄高資勢將內犯遂飭劉存厚會同余萬清虎

嵩林等相機堵剿

臣

卽由常州改道馳赴丹陽知高資賊壘已爲

我兵掃蕩卽由丹陽句容而至金陵大營與

臣

向榮和衷籌議該

逆注意蘇常必先截其內犯之路以固根本再絕其南北之援以

圖進取二十八日折回丹徒鎮會同余萬清察看鎮江東南京峴

山大營布置頗屬周密惟自京峴山東北至象山江濱尙多空隙

因與余萬清商定將空隙處所深挖濠溝取土築牆設法安礮以

杜竄逸又會同余萬清渡江前赴焦山水營總兵泊承陞管帶拖

罈船十隻與總兵周士法等所帶艇師各船聯幫停泊於焦山北

面擬俟象山牆溝工竣將泊承陞所帶拖罈船移泊於焦山南面

象山之下則南北兩岸下游皆可無虞至南面統帶潮勇之副將

站住言語不通恐有扞格商之向榮余萬清添派熟悉潮勇性情之遊擊饒永福會同管帶再將見駐甘棠橋之四川官兵移紮觀音山切近潮營藉圖鈐制其西路本甚空虛設被蔓延至馬陵榨樹岡一帶則丹陽可虞常州亦卽震動臣暫行屯紮榨樹岡勘定離城五里之九華山爲由鎮江至馬陵榨樹岡總徑虎嵩林劉存厚等統帶兵勇在九華山東北屯紮東制鎮城北窺金山爲搃吭拊背之計三月初十三等日瞭見瓜州賊船連檣渡江而南瓜鎮金山之賊分作數股傾巢而來另股逆匪奔上九華山北惟時劉存厚等皆已督兵出隊臣帶領小隊在劉存厚營前山坡督戰將山梁之賊登時擊退挖營艇師等船亦起舵攻擊北固山甘露寺磯隄以分其勢因南風過盛不能直抵金山賊仍分數股傾巢而來臣與余萬清督兵分途圍裹斃賊不計其數滿擬四面合圍

適大霧迷漫對面不能相見致大股仍被免脫殊爲可惜見在會商向榮余萬清或先取金山或徑拔鎮城隨機進剿以副 聖厪報聞○己丑諭軍機大臣等和春等奏逆匪外援驟至官軍攻剿立破賊壘一摺我軍攻剿廬州四面合圍逆匪兩次來援均經擊敗乃安慶賊匪及金陵之賊於西南各處連築營壘意在分我兵勢經該提督等督兵攻剿斬馘甚眾舒城巢縣逆匪亦被我兵擊敗辦理尙屬得手此時廬州之賊勢孤援絕正可乘此機會督率各路兵勇奮力攻剿剋期收復其舒城等處並著嚴飭秦定三等督兵進攻無得日久遷延致該逆又圖勾結月摺奏皖省兵餉支絀請飭山東等省按月協濟已令戶部速議具奏見在高唐餘匪竄踞柱平縣馮官屯地方經大兵圍剿尙未掃除淨盡能否協濟尙未可定該提督等仍當於本省地方設法籌撥以濟軍食毋得

專待他省之款致滋貽誤將此由六百里諭令知之○于安徽殉
難同知胡子應吳廷香等祭葬世職吳廷香並建祠○辛卯諭內
閣吳振械蔣蔚遠萬福奏逆首就殲官兵陸續凱撤一摺貴州逆
匪楊淵等經官軍疊次圍剿情勢窮蹙由羅斛地方竄蘆山搭溝
山等處經參將閃雲等督兵堵截斃賊百數十名生擒九十餘名
該匪復竄擾大塘並由都勻獨山等地方竄撲麻哈州城經護貴
東道鹿丕宗並署知州何鋌內外夾擊斃賊多名該匪復由平越
甕安竄入餘慶縣屬之龍溪場署清江通判韓超雲南鹽法道王
成璐等督率兵練四面兜圍於三月初七日分路齊進殺賊無數
賊匪突圍敗逃官軍奮力追殺至石阡府屬之葛莊司河邊楊淵
先已渡河兵練梟水趕上立時殲斃並斃賊二三百名生擒一百
餘名落水死者不計其數該逆楊淵等聚眾倡亂擾害地方經四

川雲南官兵會同貴州兵練悉力勦捕俾首逆就殲餘黨解散地方漸就肅清辦理尙無貽誤貴州巡撫蔣霽遠著開復革職畱任處分仍著將在逃零匪悉數搜除毋得稍畱餘孽其一切善後事宜並著飭各該地方官妥爲經理○諭軍機大臣等吳振械蔣霽遠萬福奏官軍追剿賊匪陣斬首逆殲除匪黨地方漸就肅清一摺首逆楊瀾經官兵在石阡府地方殲斃並將匪黨疊次剿殺多名諒不至再有蔓延所有川滇兵丁自應酌量裁撤以節糜費其一切善後事宜並著該撫妥籌辦理至川兵隨營糧臺前經諭令蔣霽遠派員督辦見在首逆業經伏誅貴州軍務將次告蒧著照蔣霽遠所請軍營兵餉仍畱川省委員支放其報銷各事宜並著責令該委員一手經理以歸畫一將此由六百里各諭令知之○諭王懿德奏派兵赴浙防剿一摺該督因聞徽州警信派令總兵

饒廷選護參將王煜遊擊高士濬管帶閩兵一千名於三月初八日啟程前赴嚴州扼剿約計此時當可抵浙見在徽郡賊已敗竄浙江兵勇已進剿黟縣嚴州防務似可稍輕而江西之賊由樂平德興擾及弋陽逼近廣信浙江衢州一帶較嚴郡更形喫重雖經王懿德另派官兵四百名前往河口等處仍恐兵力單弱此項赴嚴閩兵自應急援江西爲要著何桂清斟酌情形妥爲調遣如果徽郡尙須添兵卽飭饒廷選帶兵前往會剿儻廣信賊情較緊卽將該總兵所帶之兵調赴廣信並可與江西官兵合力進剿饒州總宜何處喫緊卽從何處進兵毋得株守一隅再據御史宗稷辰奏黃巖縣六品職銜黃萬年曾剿漁山海寇出力其人頗有才略黃宗漢檄令募勇爲遊擊王邦慶所阻等語著何桂清詳細查看如果實在可用卽飭令帶勇隨剿亦可藉資驅策儻係有名無實

亦毋庸率行收錄將此由六百里諭令知之○予禦賊被害主簿
孔廣幹祭葬世職○是月豁免河南永城縣被擾地方額賦